

四庫全書

史部

欽定四庫全書

史部

浙江通志卷二百十八

詳校官給事中_臣戴璐

檢討_臣德生覆勘

總校官編修_臣倉聖脉

校對官中書_臣石鴻緒

謄錄監生_臣方汝觀

欽定四庫全書

浙江通志卷二百十八

祠祀二

杭州府下

海寧縣

先農壇 在春熙門外東郭十八都一畝

國朝雍正五年知縣胡杲奉文建立壇宇并置耜田四

畝九分

社稷壇 萬厯杭州府志在縣城北白馬廟後杭州

府志宋政和間令歐陽珣即舊址新之

歐陽珣社稷壇記古

者建國設都先立社稷其意以謂民非穀不養穀非土不生立五土五稷之神而祀之示不忘本也鹽官雖窮隘僻左而舊壇具存即其舊而新之社壇居其左稷壇居其右就社稷之左右別為兩壇祀雷雨風師而又設燎壇於其東建齋廳於其北直北為一門自門之左右皆立垣墉以為衛率按圖而為之稽諸禮若合符契於戲避哉 元明屢更正德三年知縣丁

儀改建今處增置宰牲齋宿等舍

風雲雷雨山川壇 萬厯杭州府志舊在縣南二百

五十步成化年重建去城八十步

邑厲壇 成化杭州府志在縣治北二百六十步

城隍廟 杭州府志在縣北二百六十步宋圖經考

異神邑人稱為永固王

謹按咸淳臨安志本府城隍神舊號永固廟據此則通言一府矣蓋神聰明正直聖不可知非可求其人以實之也間有實其人者悉援據志來不敢以臆為斷

潮神廟 在小尖山之麓

國朝康熙六十一年

勅封運德海潮之神遣官致祭

勅建海神廟 在海寧縣春熙門內

國朝雍正七年九月欽奉

上諭勅建

恭紀
首卷

浙江總督

臣

李衛欽遵擇海寧縣治之

春熙門內購買民地四十畝起建居中正殿五楹

崇奉運德海潮之神左右配殿各三楹以厯代潮

神水神從祀

祀越上大夫文種漢忠烈公霍光晉
橫山公周凱唐潮王石瑰昇平將軍

胡運宋周宣靈王雄平浪侯捲簾使曹大將軍春
護國弘佑公朱彝廣陵侯陸圭靜安公張夏轉運

使判官黃恕元平浪侯晏戍仔護國佑民永固土地彭文驥烏守忠明寧江伯湯紹恩恭棖土地陳旭周迴夾以修廊中為甬道前為儀門三楹大門三楹左鐘樓右鼓樓門臨大河承以石梁曰慶成橋橋南歌舞樓三楹繚以粉垣闢左右為廣衢表以二石坊殿後為重門進內正中恭建

御碑亭敬勒

聖製海神廟碑文

恭紀首卷

後為寢殿上構岑樓東西配殿

由正殿之東啟門而入為天后宮前為齋宿廳後

為道院正殿之西為風神殿後有池有亭池上為
平橋三折而度內為高軒為重門後為水仙閣規
制崇閎氣象肅穆經始於雍正八年三月以明年
十有一月訖工十一年正月

欽頒

御書福寧昭泰四字一幅製額奉懸廟中二月欽奉
上諭遣官告祭

御祭文

維雍正十一年歲次癸丑二月朔越 日

皇帝遣內大臣海望直隸總督李衛等致祭於

寧民顯祐浙海之神曰

明神受職於

天恩覃澤國禦災捍患利賴弘深凡茲東南黎庶所得保
室家而安耕鑿者

神之賜也朕躬膺

天命撫御寰區夙夜敬共以承上下神祇之祀所期海宇

蒼生永蒙庇祐惟茲浙西郡邑實為瀕海要衝比年
以來仰荷

神靈嘉貺頻昭安瀾共慶廼者風潮鼓蕩衝潰隄防近
逼民居吏人震恐朕痾瘝在念軫惻維殷耑遣重臣
周行相度涓日鳩工為海疆圖久遠奠安之計用是
潔誠致禱虔命在工大臣敬展祀事昭告惻忱惟
明神俯念海隅億萬生靈城郭田廬於茲托命隄工木
石皆出脂膏力役所需民衆勞苦伏冀

弘昭福佑默相大工綏靖百靈風恬波息俾工作得施
長隄孔固克底厥績衛護烝民保聚生全安享樂利
則東南列郡溥被庥祥朕實拜

明神之功德於無疆矣謹告

三皇廟 成化杭州府志舊在縣東南二里元至正

十九年築城改建於縣治之西北

黃潛三皇廟記
延祐五年知鹽

官州張侯克明以部使者北舉張公之命肇建三
皇廟於州之東南泰定元年方侯存心繼知是州
增創東西廡及儀門後改號州曰海寧而李侯肇
以至元三年來知州事又為造禮器遷櫺星門前

臨通衢右廟而左學齋廬庖舍次第畢完今知州張侯蒞事之明年至正二年也集僚佐報俸貲置田五十三畝有奇歲入以紹祀事有餘以待營葺之須來徵文以記之按宋元嘉中醫始有學唐天寶間三皇始有廟言醫及陰陽者乃原其所自推三皇以為先聖天下都邑咸得通祀焉夫三聖人之道既非一藝可以名言而其功亦無一物可為報稱茲不敗復贊一辭姑叙其建置之顛末而著其成規以為之記張侯名光祖字載熙霍山人

崇祐廟 萬厯杭州府志在金牛山下宋紹興間禱

雨有應賜額杭州府志俗云烏龍王廟在縣東八

十二里

白馬神廟 海寧縣志在縣北二里

宋高宗祝文英烈不羣捍難庇

民廟號白馬史冊莫尋海昌良工塑像如神髣髴而馭先無若存有捕盜者得夢既禽人知畏饗血

食幾春天子初郊典祀備循樽酒俎豆以祈神歆

陸司空廟 萬厯杭州府志在縣東四十八里祀吳

陸遜嘗以屯田都尉領邑事有惠於民故立祠祀

馬

許公廟 海寧縣志在縣西一百三十步

鍾必萬雄挺盡節廟

記縣西蕩有將軍許遠嗣後增祀張巡乃號雙廟宋紹興八年詔增祀南霽雲雷萬春姚閻蓋從邑

人禮部侍郎張九成之請也中興初皆賜上公爵
祖豆牲牢如上公禮勸民之意遠矣鹽官許公故
里舊史圖志可據也獨新史畧之或遂以公為敬
宗曾孫乃誣公杭之新城人殊失建祠錫爵之本
意敬宗善心之子而善心則亨之子懋之孫也按
北史善心傳南史懋傳並著鄉里高陽新城以此
知舊史載敬宗為杭之新城者誤矣
後之人不考併與公誣之烏得無辨萬厯杭州府

志洪武四年以海寧為公所產地宜專祀罷諸增

祀者改舊封荊州大都督為睢陽太守從生爵也

祭以歲十月十六日公死節之辰正德十六年易

春秋致祭

謹按貢師泰云鍾必萬所辨以善心為高陽北新城人當隋文帝平陳曰我平陳國惟獲善心一人則善心本南人也又謂睢陽非敬宗曾孫不通鑑實言之嘗考許氏譜言許本高陽六朝時許販避亂移家鹽官傳十世名善心為隋禮部侍郎因官北地復宗祖族歸高陽其子則敬宗也俱為北高陽新城人同葬易水至敬宗子名適者又歸隱鹽官東審山故其子彥伯其孫遠皆為鹽官人矣觀此則鍾所辨猶未析也後睢陽六世孫名慶避黃巢亂由昌化入新城以存宗祀宋乾道二年縣令耿秉建祠於塔山祀遠錄慶之孫主祀他志載杭之新城者亦誤也今考隋書地理志高陽隸河間並無新城縣又舊唐書許敬宗傳云敬宗杭州新城人則非北新城明矣當是適遷居鹽官至慶復還新城耳

雙仁祠 嘉靖浙江通志在城西北安化坊

沈友儒雙仁祠

記昔錢武肅王立廟祀唐平原太守顏真卿而以其從兄常山太守杲卿為之配扁曰雙仁蓋取殺身成仁之義正德九年建祠安化坊迨嘉靖己酉重修文天祥有感詩平原太守顏真卿長安天子不知名一朝漁陽動鼙鼓大河以北無堅城君家兄弟奮戈起一十七郡連城盟賊聞失色分軍還不敢長驅入咸京明皇父子得西狩由是靈武起義兵唐家再造李郭力逆賊牽制公威靈哀哉常山賊鈞舌公歸朝廷氣不折崎嶇坎珂不得去出入四朝老忠節當年幸脫安祿山白首竟陷李希烈希烈安能遽殺公宰相廬祀蔽日月亂臣賊子歸何所茫茫煙草中原土公祀於今六百年精忠赫赫雷行天

胡令公廟 杭州府志在長安鎮祀唐胡暹

徐圖胡令公廟

碑令公字進思婺州東陽義烏人唐憲宗朝佐中丞裴度平淮西以功陞武任將軍宣宗時奉命至海昌召禪門齊安國師演法謝恩就坐而化將軍回至長河過海神祠亦立化於庭有司申聞宣宗遣衆稱以御帶追封齊安為悟空禪師進思為昇平將軍與海神共祀至宋康王南渡乘駿過長河無船可渡入廟叩之出門忽有大舟迎王王問其名居曰衆稱二姓木里胡進思家人也建炎元年王遣官名進思併衆稱二人里中並無因廟中有胡將軍碑載將軍住海昌名齊安國師事蹟州官中復降詔勅封令公海神與衆稱皆進王號同祀土穀廟號威烈赫靈之殿泰定間復有方太守入廟禱祀蝗不入境之異其父方虛谷任婺州路侯備知令公事蹟婺州見有永康縣胡公祖廟太

守命里人重

立碑石云

福濟廟 萬厯杭州府志在金牛山下祀唐蘇臯二

將軍相傳二將逐黃巢至此不獲死之因立廟

名勝

志金牛山稍北為廟山深窅迴曲其巔則蘇臯二將軍廟在焉宋高宗祝文義氣同稟剛毅莫倚何馬來此緣逐金牛牛沒尾掉空回可羞拔劍自刎曾無怨尤人亡廟存英氣橫秋

安化王祠 海寧縣志在三管墩去邑治五十里祀

宋王稟杭州府志天啟中知縣鮑觀光移建縣東

偏隙地歲時致祭

許三禮安化王祠碑記邑中舊有安化王祠王於靖康元年以

郡統與子荀守太原兵單力竭太守張孝純議降王叱之列兵守死城陷王父子相隨入原廟負太宗御容同赴汾水以殉國難高宗駐蹕臨安念王父子殉節追封為安化郡王謚忠壯子荀贈右武大夫恩州刺史

張文忠公祠 萬厯杭州府志在城南書院中祀宋

禮部侍郎贈太師謚文忠張九成

于有成張文忠公祠記無垢先

生張公九成以紹興二年廷魁天下官至禮部侍郎高宗欲大用之適與時宰議論不合謫居南安十有四年放還守永嘉未幾奉祠歸里終於鹽官紹定二年縣宰趙汝皓來首率諸僚建祠於淨居寺之堂上

朱將軍廟 成化杭州府志在縣東三十六里黃岡

杭州府志神為邑人朱彛能拔牛尾倒行宋治平

初溺海為神著靈應寶祐三年勅封佑靈將軍

元大

德二年封贈文鹽官州海神開靈浙右安宅海隅
江漢朝宗無遠勿屆雨暘時若有感必通比聞高
岸之傾摧能免下民之墊溺導水波而潛伏益固
隄防足財計以阜通仍輶斥鹵嘗閱省臣之奏具
知神力之雄策錫嘉名丕昭令問聿嚴
廟貌特俾恩封可賜號靈感弘祐公

錢公廟 海寧縣志在洛塘前步橋北祀里人錢通

元泰定間通有德於鄉死而祀之水旱災疾禱之

輒應邑人談遭謬記相傳廟南河洲即公葬處

貢尚書祠 海寧縣志在安國寺東祀元尚書貢師

泰

朱嘉徵貢尚書祠記元至正間先生以秘書召嗣擢大司農被命治粟閩粵時道梗留居余家

小桃源內九世祖質夫公鏐執經焉明興先生恥事二姓有終焉之志宋文憲濂銜命往強起之先生無言一夕仰藥而卒萬厯七年公諸孫貢禮卜地安化坊於安國寺東建祠肖像題額貢尚書祠

致忠祠 萬厯杭州府志在城內祀副千戶呂忠詳傳

忠臣

周將軍廟 杭州府志在黃山祀明都指揮周應禎

嘉靖三十三年倭寇掠袁花市應禎戰歿邑人建祠致祭

忠義節孝祠 忠義祠三間碑一座在學宮櫺星門

內西甬道側節孝祠三間牌坊一座在學宮外泮

池西

國朝雍正三年知縣鍾維楷奉文建

富陽縣

先農壇 在城外一里東郊地名花塢口

國朝雍正六年知縣崔宣奉文建立壇宇并置耤田四

畝九分

社稷壇

富陽縣志在縣西二百步

風雲雷雨山川壇

成化杭州府志在縣東一里觀

山之上杭州府志明宣德十年知縣吳堂重葺後

移小龜山上

邑厲壇

萬厯杭州府志在縣北二百步

城隍廟

富陽縣志在縣東二百步洪武丙午行省

平章政事朱文忠重建正統四年知縣吳堂重修
仁惠龍王廟 富陽縣志在寶山院齊永明中有僧
曇超居杭之靈苑山有龍化為老人詣超曰吾龍
也昆弟五人吾居其長邇鄉民耕山逼吾居室羣
龍並怒閉膏澤以害稼吾不忍民困苦聞師道行
請至富春鹿山以化伏諸弟超允其請未即往龍
乃感夢於官民迎超至觀山結壇戒衆浮舟誦經
雨大霑足前龍復請超居湖南山巖山峻不能陟

龍化為白馬載師以登至今石上馬跡猶存焉巖
下有池名龍潭水中產一種四足五爪狀若蠅蚘
土人號為龍子歲旱禱之則雨嘉定三年賜額仁
惠

赤松子廟

咸淳臨安志在縣東一十里

輿地志赤松子神農

時雨師也

嚴先生祠

咸淳臨安志在觀山淳祐乙巳令李

迪建有堂曰耕春

名勝志孫氏建道觀於石頭山頂故名觀山有嚴君祠及耕春

逸雲虛全三亭聶大年嚴先生祠記先生辭諫
議之職去耕釣富春山中富春今屬杭邑而桐廬
舊境也邑東有赤亭山相傳為先生釣遊之處固
宜有祠吳君為令能以首賢遺跡作祠肖像以風
厲其邑人可謂
知所先務矣

靈惠廟

咸淳臨安志在縣西一里按郭氏家譜云

侯名成字元禮仕吳為黃門侍郎封永興富春二

縣侯後人因為立祠嘉熙四年勅以靈惠為額封

英濟侯

通聖侯廟

咸淳臨安志在縣南十五里五代末縣

令陸仁璋因祈禱有應請於朝封為通聖侯杭州府志舊名宋明王廟即今羅橋廟

張明府君廟 萬厯杭州府志在縣北宋大中祥符間嘗宰是邑有惠於民民感而祠之祠下有泉歲旱不竭禱之則應

福祐廟 萬厯杭州府志在長壽巨石洪山下祀神宋恭宋咸淳四年大旱禱雨立至禦災捍患屢有靈驗六年勅封昭澤侯立祠祀之

正學祠 富陽縣志在縣北三十五里開化村祀宋

周濂溪邵康節張橫渠程明道程伊川朱晦菴明
薛文清胡敬齋陳白沙王陽明十先生

永濟廟 富陽縣志在馴雉村舊名石八郎廟一作
十八郎里人何永年建以已穀貯於廟側歲賑鄉
民因名永濟

胡公祠 富陽縣志在縣南十里太平村孤山祀杭
郡守胡濬濬於天順間行縣修築水閘民受其利

祀之

報功祠 杭州府志在恩波橋西南祀明知縣吳堂
宋時儒施得陽三公俱有功德於富陽邑人共祀
之天啟間知縣蕭岫重葺

忠義節孝祠 忠義祠三間石碑一座在學宮節孝
祠三間石碑坊一座在東門外館驛基

國朝雍正四年知縣崔宣奉文建

餘杭縣

先農壇 在南門外東南隅二畝

國朝雍正五年知縣李弘沂奉文建立壇宇并置藉田
四畝九分

社稷壇 萬厯杭州府志在溪塘之北去縣治西二
里

風雲雷雨山川壇 成化杭州府志在縣東南一里
邑厲壇 成化杭州府志在縣治之北

城隍廟 成化杭州府志在縣治之東餘杭縣志洪

武初知縣魏本初建弘治五年知縣孫冕重建嘉靖七年知縣王確重建萬厯丙辰知縣戴日強重修

修

國朝康熙三年知縣宋士吉重修

嘉應祠 成化杭州府志在縣西南一十八里洞霄

宮西廡後祠下撫掌泉與大滌泉源通號龍井宋

紹興九年詣洞投鐵簡得雨封嘉應侯

宋咸淳六年加封勅

文韓愈有言龍不得雲無以神其靈然則出雲者山川也是必有神也以司凡近畿之地澗澤井泉

泓沉深碧間者旱乾之禱油然沛然龍乎神乎雖變化有不可測而民之受賜博矣特申錫徽名尚褒陰號

高岡福善王廟 咸淳臨安志在縣東北一十五里
唐大厯二年縣西湖塘為大水衝壞邑人甚恐走
錢塘崇化鄉觀山禱於祠下大水為之絕流事聞
於官立廟封為福善王

仇王廟 名勝志仇山在餘杭縣十五里上有仇王
廟故名下為仇溪咸淳臨安志廟城周圍七里約

高一十丈有洗馬池靈雞堆養馬場紹興二年縣

令張承嗣重建

白居易傳仇王廟文錄杭縣自去年冬迄今秋虎暴者非一居易與

師儒猥居牧宰慚無政化不能使渡河出境是用虔告於神正直聰明盡鑒於斯

沂泊侯祠 萬厯杭州府志在縣西北一十五里孝

行鄉宋時烏珠兵迫城下神助其力鄉人拒之三

日不得進事聞於朝封侯立祠祀之

諸葛使君廟 咸淳臨安志在縣南一十四里禪山

下祥符舊志縣人諸葛琮有賢德後漢時為河間

太守居禪山卒葬其旁降神於巫能興雲致雨邑人廟而祠之唐貞觀二年建梁乾化五年封永昌侯

太平靈衛王廟 成化杭州府志在縣治之東後漢陳渾為縣令有功百姓祠之為鎮城土地以段主

簿郭典案從祀皆當時贊力之人也

扈大亮靈衛王廟記王自

東漢熹平間嘗宰是邑百姓為之立祠後唐長興中封太平靈衛王蓋餘杭為大溪橫截而衆山之水合流其中每遇靈雨天目之源一決則湍悍奔溢勢不可禦邑人患之王以溪南大野其地汙下

足以潄水於是築塘環繞凡三十餘里號曰南湖
即湖之西北鑿石門以通大溪鍾洩其水遂亡墊
溺之患而又徙置縣治葺城池造舟梁置堰開濠
至今賴其賜治平末縣令齊君新其廟貌大亮書
此於石以
久其傳焉

惠澤祠 萬厯杭州府志在縣南湖塘舊為龜山書

院祀宋縣令楊時明成化間增祀漢縣令陳渾唐

縣令歸珖

嚴沆重修惠澤祠記邑南有巨湖漢令陳公渾所鑿通苕溪以泄水者也唐令

歸公珖能循其跡有宋楊公時興水利拒蔡京相
塚之謀宋人築祠以祀稱龜山書院歷久湮蘊
為蔬圃明少保鄒康靖公幹尋復故址因念三賢
之功德及民者大從諸父老意請於官合祠而奉

之廟曰惠澤沈仲璘惠澤同詩一鑑湖山老三朝
惠澤新桑麻省匝地桃李沐長春天柱青排障
亭碧洗塵夕陽依
故院留照古今人

歸府君廟 杭州府志舊址在南湖塘今徙山川壇

南祀唐縣令歸珖又歸夫人廟在縣東二里山西

園夫人與珖俱死水難屍流至此顯異立廟祀之

正儒祠 萬厯杭州府志在儒學禮殿之東祀宋楊

時朱熹明嘉靖二十一年建

朱文公祠 餘杭縣志在縣西南一十八里

馬堽朱文公祠

記學南十里餘有洞霄宮存紫陽夫子遺像夫子
固配享文廟者也而洞霄之祀乏焉夫子同里志
初程侯歲壬寅來主是邑遊洞霄謂像不可無祠
也捐俸購田為公祠計而邑人洪都慨然以已田
應焉

廣福李王廟 杭州府志在縣東南一里許南渠河
土人指為宋李顯忠廟自元迄今邑民奉之明洪
武六年重建永樂六年知縣林源修正德二年邑
人鄒煜復新之

旌德祠 餘杭縣志在鳳山

鄒虞旌德祠記苔邑之
南曰鳳山鄒氏二世祠

堂在馬先永樂二十一年文敏公歿墳而不祠洪熙改元之初始建祠以祀成化五年再祠以祀康

靖文敏諱濟字汝舟

康靖諱榦字宗盛

忠義節孝祠 忠義祠在縣學內節孝祠在山西園

東南一畝便民倉舊址

國朝雍正四年知縣閻紹祖奉文建

臨安縣

先農壇 在城東門外南北鄙一畝

國朝雍正六年知縣張桐奉文建立壇宇並置耜田四

畝九分

社稷壇 嘉靖臨安縣志在縣西半里

風雲雷雨山川壇 嘉靖臨安縣志在縣南半里

邑厲壇 萬厯杭州府志在縣北

城隍廟 嘉靖臨安縣志在縣東五十步南北鄉

獨山廟 臨安縣志在治東安義鄉山下有潭遇旱

禱之即應五代唐同光五年吳越王封其神為鎮

水山王立廟祀之勒制於石明洪武八年旱甚令

賈鵬程率士民禱於廟日方午禱畢雨至

靈澤廟 成化杭州府志在徑山能仁寺神為龍神

歲旱禱多應宋紹興八年賜額累封顯應孚佑昭

濟龍王

惠濟廟 萬厯杭州府志在縣西三十里本東天目

山王也宋淳祐八年禱雨有應趙與憲請於朝封

靈雨公賜廟額

永定廟 咸淳臨安志在縣西北三里唐咸通十四

年置舊志云本東晉虞府君也唐乾寧二年勅封
永定王

吳越武肅王廟 咸淳臨安志在縣東後唐長興四
年建臨安縣志錢王太廟在治東三十步今廢

忠義節孝祠 忠義祠三間碑一座在學宮門內東
偏節孝祠三間牌坊一座在學宮外大成坊東隅
國朝雍正五年知縣朱琬奉文建

於潛縣

先農壇 在鎮郭坊東郊

國朝雍正六年知縣王自麒奉文建立壇宇并置耤田

四畝九分

社稷壇 成化杭州府志在縣西寶城里

風雲雷雨山川壇 成化杭州府志在縣南一里金

鵝山下

邑厲壇 成化杭州府志在縣北一里石龍塢口

城隍廟 杭州府志在縣治西街舊在治東宋隆興

中令葉衡徙今處元至正十年兵燬明洪武三年
令梁誠重建

昭應廟 萬厯杭州府志在天目山舊為龍王祠在
縣北宋崇寧三年賜額政和三年封淵源侯累封
孚惠王

靈惠廟 成化杭州府志在縣西南三十五里係浪
山龍祠宋紹熙四年令邵文炳具述其靈應嘉泰
元年賜額

皇甫君祠 杭州府志在縣治東戴石村祀漢皇甫

嵩

吳度皇甫君祠記於潛東距縣十五里有山曰皇甫巖有廟曰皇甫祠按縣舊志謂後漢皇甫

嵩破妖賊許生嘗駐兵於此有冶鑄郊壇城寨尚存蓋民賴公平賊於是姓其山曰皇甫巖又為之立祠也祠初立於山頂崇寧甲申徙於姚家巷慶元己未又徙於資聖院左別祠十有一所水旱疾疫有禱輒應歲久人或訛皇甫為黃杜為黃洞咸淳甲戌十月之望邑士陳惠道請記其事

三賢祠 成化杭州府志在縣西一里野翁亭之右

宋刁璡毛國華為令有德政東坡倅杭行縣皆為賦詩慶元初令趙彥侯立蘇刁祠名二賢堂開禧

二年令胡衛增毛長官像改曰三賢堂春秋二丁
遣學職致祭

二賢祠 成化杭州府志在縣南半里宋縣令葉衡
嘗為民除無名錢邵文炳為臧山鄉折米之直民
思之立祠

忠義節孝祠 二祠俱在本縣南門外儒學前
國朝雍正六年知縣王自麒奉文建

新城縣

先農壇 在東門外城郭都五畝

國朝雍正五年知縣羅燝奉文建立壇宇並置藉田四

畝九分

社稷壇 萬厯杭州府志在縣西北半里

風雲雷雨山川壇 萬厯杭州府志在縣南半里

邑厲壇 萬厯杭州府志在縣治之北一里許

城隍廟 新城縣志在縣治東南洪武八年建嘉靖

六年知縣袁澤重建隆慶三年士民增建後殿及

置祀田若干畝歲五月十七日以神誕致祭

廣利廟

新城縣志在昌東鄉

劉度威顯廣利侯廟記松溪廣利廟者威

顯朱侯名徹字仲通仕晉為分水令既卒父老思之為立廟松溪旁錢氏封安境通靈侯大觀四年部使者以雨暘應禱奏請於朝詔易錢氏之封曰威顯高翥松溪廣利廟詩廟自同年立門深晝不扃寒藤扶壞壁秋草映疎櫺溪接東西碧山分遠近青老巫逢客至謾說有神靈

許忠烈祠

成化杭州府志在縣西二里塔山祀唐

睢陽太守忠烈侯許遠宋乾道三年知縣耿秉請

於朝賜額靈惠

孫尚書廟 新城縣志在太平鄉百丈村成化杭州

府志神名陟仕錢氏戰歿於陣以墓在所居太平

鄉之西廟立於斯

傳詳忠臣

杜將軍廟 成化杭州府志在縣西半里將軍諱稜

字騰雲為吳越王錢氏行軍司馬後以其子建徽

貴贈太師祠久燬洪武三年重建

名勝志唐大順二年錢鏐部將

杜稜訪得古城遺址因山拓而城之乾寧中董昌圍急城中無水穿百尺不得泉杜稜倚之泉立至後人因名杜公井方廉杜將軍廟記乾符間稜為東安都將今縣治即東安鎮也後鏐滅昌稜為兩

浙都指揮使許在鄉建立生祠尋拜潤州刺史而卒祠在縣西百步肇基於光化增建於嘉泰重修於嘉靖歲重九日有司致祭為神誕辰也

靈休靈佑廟 成化杭州府志在縣治北二里神姓

張氏范氏官兵平方臘二神俱有陰功宋宣和三年賜廟額張曰靈休范曰靈佑

姚開府廟 萬厯杭州府志在東洲鄉姚村祀宋襲

慶軍節度使姚興

傳詳忠臣

耿侍郎祠 明一統志在縣北二里侍郎宋令耿秉

也秉宰是邑有惠於民民立生祠

輔德廟

杭州府志在縣南太平鄉淶渚

方回廣靈輔德廟記

侯杭之新城縣人周姓雄名字仲偉生於宋淳熙十五年以嘉定四年卒舊陳方巾綠袍巨鼻偉目魁岸塊碩依憑示現或托夢寐祈報響應端平二年饒州言侯於德興祈佑陰捍常山草寇旗甲金鼓恍惚雲際始封翊應將軍淳祐四年封翊應侯寶祐二年賜額輔德廟五年加封助順七年加正烈十年加廣靈徐士晉周孝子祠碑記宋淳祐間我邑有孝子周雄字仲偉者事後母素謹賈於衢聞母病急破浪以出為水所沒越日屍浮於江顯神於衢帝感其孝勅為江神余地淶川為公桑梓里公之先墳墓在馬公沒父老即以其宅為祠峯巒環抱古木陰翳江湖流抵廟而回憶孝行顯

不重
乎哉

忠義節孝祠 二祠俱在文廟左側常平倉舊基內
國朝雍正五年知縣羅燝奉文建

昌化縣

先農壇 在縣東南門外上清宮所

國朝雍正六年知縣俞又機奉文建立壇宇並置藉田
四畝九分

社稷壇 成化杭州府志宋立壇在縣東一百五十

步元別置於城西南之上灘園明洪武二年始於
縣西即舊慈濟院基建之後以壇址迫山去西半
里上黃嶺拓地改建

風雲雷雨山川壇 成化杭州府志洪武二年始建
於雙溪之南山下後以渡水不便改築於上清宮
之西其址狹隘又遷於縣城東南

邑厲壇 萬厯杭州府志在縣東北唐山之麓

城隍廟 成化杭州府志舊在縣南一里元末燬於

兵洪武二年即舊址創廟宇三間三年併其東真
聖觀基及拓民地廣之

許由廟

昌化縣志在箕山上

張芬甲子山記自許由廟西經牽攢山而

北有崩馬名曰長風相傳為許由舒嘯處汪瑋迴
風菴記吳昌諸山最勝在西北道曰千頃由麓升
三十里許上有龍潭廣可數百畝隱然
巨浸與他山殊別或曰許由故居也

謹按許由所隱箕山在河南登封縣茲昌化山名
偶同遂多傳會未足信也因舊志所載錄而正之

三賢祠

杭州府志在儒學左祀晉許邁唐羅隱宋

蘇軾

東坡祠 萬厯杭州府志在蕩縣治前邑令章伯奮

建又名新亭

徐觀新亭記熙寧間縣令陸元長臨北流為亭蘇公軾經由亭上題詩記

事有雙澗響空之語其後館四方之賓客間陪二年永嘉侯傾其棟宇願地因廢撤之別置館於上清宮之東偏即故址一新其亭傍為屋陳東坡而祠之

朱將軍廟 昌化縣志在縣西七里洞元時勅建旱

澇祈禱輒應一在杜嶺

鄭公祠 杭州府志在縣治左祀明知縣鄭國士

忠義節孝祠 忠義祠在明倫堂西偏節孝祠在學

宮西偏

國朝雍正五年知縣黃河清奉文建

浙江通志卷二百十八

欽定四庫全書

浙江通志卷二百十九

祠祀三

嘉興府

嘉興縣

附郭

秀水縣

附郭

先農壇 在東門外白五都地字圩號內

國朝雍正五年嘉興縣知縣戈鳴岐秀水縣知縣魏大

德奉文建立壇宇并合置藉田九畝八分

社稷壇 舊嘉興府志在阜城門外五福鄉西北都

嘉秀二縣皆統於府

風雲雷雨山川壇 嘉興府志在迎薰門外象賢二

十二都

郡厲壇 萬厯嘉興府志在望吳門外即菩提院舊

址

城隍廟 嘉興府圖記在府治西北一里嘉靖丁未

知府趙瀛增葺兩廊以居二縣城隍之神

賀燦然重修城

隍廟碑記廟在郡治西北一修於宣德壬子再修於嘉靖戊申今且六十餘年矣郡伯新都吳公首捐俸倡諸僚屬於正殿則仍而葺之於殿前之軒則增而昂之於殿後之堂則撤而更新之於大門儀門於寢殿於兩邑城隍之殿及廊廡則丹堊而潤色之經始於萬厯庚戌嘉平月迄辛亥嘉平之望遂告成事

順濟龍王廟

弘治嘉興府志在郡城西通越門外

三里景德禪寺之右三塔灣之左

李時習順濟龍王廟記景德寺

前有三塔枕其流流之深倍左右四尺龍之所宅也寺有如藍祠號順德龍王淳熙元年夏五月潭

之所大雨雹殆陽不克也克必過過則為旱已而不雨至於秋七月取虎顱骨加之於三塔之潭時畢大雨歲以大熟嘉興府志明洪武三年封順濟乃即廟貌寵新之

龍王宣德五年知府齊政構祠繪像

徐偃王廟 至元嘉禾志在縣西二十里偃王逃之

會稽王之宗族嘗有散在邑者故後世為廟以祀

伍王廟 舊嘉興府志在嘉興縣東二十七里胥山

子胥代越經營於此唐乾寧中勅封為吳安王

越相國范公祠 嘉興府志在府治西南金明寺後

按范蠡嘗居嘉興今稱陶朱公里祠南臨范蠡湖

東為范公浜

吳偉業金明寺謁范少伯祠詩載權滄江學釣魚五湖何必計然書山川

禹穴思文種烽火蘇臺弔伍胥浪擲紅顏終是恨
拜辭烏喙待何如却憐愛子猶難免霸越平吳事

總虛

三賢祠 嘉靖浙江通志在府治西北元大德間建

祀漢朱買臣唐陸贄宋陳舜俞

羅汝敬重建三賢祠記浙江嘉興古

吳郡地漢會稽守朱買臣唐宰相陸贄宋山陰令
陳舜俞實生茲土是為三賢元大德間鄉老以其
行義足以淑諸人請祠春波門外以春秋二仲之
上丁祀之歲久圯於沮洳洪熙紀元初大理卿胡

公柴乃治郡西三皇
殿之故址重構焉

關帝廟 嘉興府志在府治北一里跨寶帶河為石
梁廟於其上明嘉靖間知縣張烈文建

玄壇廟 舊嘉興府志在嘉興縣王家坊神姓趙名
朗字公明趙子龍從兄弟也明萬厯辛亥工部郎
中陸基恕建

謹按仙都志趙侯廟乃後漢趙炳也今正一宗壇
給趙侯禁氣錄即此所謂趙侯禁師者是宋元豐
七年封靈顯佑廣惠威烈王據此玄壇神當屬
趙炳府志所云趙朗字公明羽士訛傳似未可信

許公廟 至元嘉禾志在嘉興縣西一里許公名安仁晉黃門侍郎也

陳司徒廟 名勝志嘉興縣西南陳司徒果仁祠唐咸通中建十國春秋梁封故隋司徒陳果仁為福

順王

陸宣公祠 嘉興府志在城西報忠坊即嘉興縣學故址舊祠在州學中宋建炎三年作書院於鴛湖

之東後屢遷

呂祖謙陸宣公祠記唐史載陸宣公贊蘇州嘉興人石晉時吳越王元瓘

奏以嘉興置秀州城東橋以宣公名者先老相傳公所生之地郡學故有公祠今郡守直顯謨閣東平呂侯正已復葺而新之維秀陪翼行都典治為天下劇侯獨置迎將期會之煩表公以風勵多士其知本務矣金幼孜重修宣公祠記洪武初郡守劉澤民重建於城內實元江南書院之故址歲久為有力者所侵奪宣德二年大理卿胡元節購材鳩工復厥侵地命郡人王愷之董其役薛瑄重修宣公祠記景泰二年知府事江西舒君敬上章以公乃唐之名臣忠節著於當時奏議行於後世其遺廟雖存自昔以來官無祭饗宜量給官錢修舉春秋祀事詔從其請

明嘉靖十七

年改建於此

李曾伯宣公祠詩公不生唐世貞元事若何主恩思報切臣罪忤時多佞

舌政何惡剛腸死不磨倚欄凝望久一驚點蒼波

裴丞相祠 舊嘉興府志在秀水縣南真如寺唐大

中年裴休捨宅為寺後人立祠祀焉

高豐廟 名勝志嘉興縣東十八里有高豐廟在崔

墓村唐朱士勉主嘉禾屯田有白雀集於高豐里

歲輒大穰遂立祠祀之

李翰高豐廟記浙西有三屯嘉禾為之大乃以大理

評事朱士勉主之且揚州在九州之地最廣全吳在揚州之域最大嘉禾在全吳之壤最腴故嘉禾一穰江淮為之康嘉禾一歉江淮為之儉公首選於衆獨當其任自朱公為屯無下歲朝嘉廩庸授

廷尉評

楊將軍廟 萬厯嘉興府志在治北一里

張寧楊將軍廟碑嘉

興縣西北五十步有旌烈楊將軍廟梁乾化中勅置將軍為守將時城陷不屈赴井死今地故有井歲旱汲不竭必其生有捍禦功於民又能死事故立廟以祀遺跡具存無可疑者

曹使君祠 嘉靖浙江通志在府治西北祀吳越曹

信及其子珪信仕錢氏守嘉興有惠政而珪為都將拒淮人有功因祀於此

曹王廟 舊嘉興府志在嘉興縣東南四十里相傳

曹武惠王彬宋開寶中帥師平江南不妄殺邦人

感而祀之

謹按十國春秋梁開平二年封故唐曹王明為昭靈侯注云明為唐太宗子淮人園姑蘇時守將於其廟輒自潰去故加封焉則神為唐曹王李明而非宋曹武惠王彬也特拈出以正其誤

蘇公祠 萬厯秀水縣志在本覺寺三過堂後萬厯八年郡守龔勉建

施府君廟 嘉興府志補護國鎮海祠在望吳門外二百步宋景定五年封今額舊嘉興府志一在縣西南六里一在縣北十五里府君名伯成九歲為

神建立廟宇墓在廟中明勅封護國鎮海侯

張烈侯廟 嘉興府圖記在秀水縣北三十里

趙龍圖祠 明一統志在秀水縣南真如寺中宋建

炎初趙叔近以龍圖待制知秀州王淵以私憾害

之殯寺中後為立祠

吾相公廟 嘉興縣志在德化一鄙宋勅封撥雲吾

相尊神祠前有深浜每歲春日衆魚來朝

報恩祠 舊浙江通志在秀水城北三十餘里元至

元間張亨壽慟父恂為宋進義校尉殉崖山之難
捨居為禪院肖像祀之

六賢祠 舊嘉興府志在仁文書院初祀薛瑄胡居
仁陳獻章王守仁後增吳與弼岳元聲

楊公祠 萬厯嘉興府志在府治西北即招提寺舊

址祀知府楊繼宗

傳詳
名宦

遺澤祠 舊嘉興府志在景德寺左祀明太守徐盈

何祉劉懋

謹按賈名儒嘉興三郡守祠記一貴溪徐盈一進賢何祉一安福王學孔別有郡守劉慤祠記不知何時去王而進劉也仍府志錄之以俟考

項襄毅公祠

嘉興府志在衆賢鄉為明兵部尚書

項忠立萬厯秀水縣志嘉靖丁亥孫項鏞建

馬輿過項

襄毅祠詩山河正氣竟何其汗簡芳名千古垂足底蒺藜歸漢日胸中介冑定秦時平沙碧草空殘壘古木黃鸝有舊祠頭白書生雙劍在叅從無地有餘悲

三賢祠

嘉興縣志在春波坊漏澤寺西偏祀明巡

撫都御史胡宗憲兵備副使劉燾巡按御史龐尚

鵬

徐太僕祠

舊嘉興府志在府治東明徐世淳守隨

州死流賊之難贈太僕少卿賜特祠

國朝康熙三年復新之其子彬捐田百畝以為祠祭之

費

傳詳忠臣

陸公祠

嘉興府志在府學東祀

國朝監察御史陸隴其

忠義節孝祠

嘉興縣忠義祠在本縣學宮節孝祠

在東關外蒯搭坊東津亭秀水縣忠義祠在集慶坊節孝祠在鍾秀坊

國朝雍正四年知縣劉德憲董懿奉文建

嘉善縣

先農壇 在東關外玖南區壹豐圩

國朝雍正六年知縣邵煜奉文建立壇宇并置耤田四畝九分

社稷壇 弘治嘉興府志在縣治西二里

風雲雷雨山川壇 嘉興府圖記在華亭塘南去縣

治一里

邑厲壇 弘治嘉興府志在縣治北一里

城隍廟 萬厯嘉善縣志在縣治東中為正殿殿後

為堂右為大寤樓左為求嗣神祠祠後為三元樓

殿兩翼對峙為六曹神閣南為中門外為廟門門

外有井泉

孫詢城隍廟碑嘉善在郡治之東三舍許宣德五年大理胡元節來自是邦以

民夥地廣析之為縣而縣治之外社稷山川風雲雷雨城隍等祠一時咸備前尹山東鄭時倡其事

景泰癸酉龍溪林侯弘來令
是邑復加葺治完舊益新

八蜡廟 嘉興府圖記在西塘鎮正德中縣丞倪璣

建

蔣愷八蜡廟記乙亥秋左司諫倪璣謫丞茲邑
嘗於邑治之西見淫祠一所撤而更之命之曰

八蜡廟一曰神農二曰后稷三曰田畯四曰郵表
畷五曰猫虎六曰坊七曰庸八曰昆蟲悉據禮為
之噫嘻數千載而下聿舉曠
典有如必者其亦可嘉也已

亞聖廟 舊嘉興府志宋南渡時亞聖四十七代孫

孟忠厚扈從臨安勅建鄒國公孟子廟於蘇州

地今

名孟子
堂前

元末圯五十四代孫孟觀避兵嘉興之清

風涇遂居焉明宣德間分屬嘉善嘉靖三十二年
山東教授司查孟氏南支在善移文浙省改建善
邑三十六年置祭田十八畝晉江陳道基碑記

國朝雍正七年奉

上諭往聖先賢祠宇着各省督撫轉飭各屬稽查修葺
欽此浙江總督臣程元章檄行嘉興府知府閻克
熙重建於學宮之南太平坊

高使君祠 馮李詩繫在嘉興府北三十六里使君

逸其名晉建武中為嘉興監屯田校尉鎮靜其民
於此立祠祀之

表賢祠 正德嘉善縣志在縣東南六里祀宋山陰

令邑人陳舜俞

呂憲表賢祠記我鄉先生賢良陳公舜俞熙寧初令山陰會時相王

安石行青苗法先生不奉令滴監南康軍星江鹽酒榷官歸日跨犢以窮林塘之趣自號白牛居士
去今五百餘年而鄉猶以奉賢名塘猶以白牛名
涇猶以清風名郡城有三賢祠以先生配享於宣
公也吳興有六客堂以先生友善
於蘇軾也其人望之重可想見矣

朱相公廟 嘉興府志在嘉善縣遷善都江涇塘相

傳宋高宗夜寢夢登紫微樓而墜有一力士捧之
得不委地問其姓氏則曰秀州朱六郎也既覺體
猶濕乃遣使訪之時六郎死已七日矣因勅封為
紫微侯立祠香火不絕

喻楊祠 嘉善縣志在縣治北斜塘鎮明嘉靖間知
縣于業建祀叅議喻良而以郡守楊繼宗配食故
合二公為今稱官置田二十二畝瞻祭

劉公臺合祠 舊嘉興府志在縣治北城外嘉興府

志明嘉靖中知府劉慤慮伍子塘水勢築臺障之
萬厯二十三年知縣章士雅建祠於臺左左祀胡
槩龐尚鵬右祀劉慤

彰義祠 嘉興府志在東關外明萬厯中知縣金和
建祀江西陣亡本縣主簿李錫本邑陣亡福建汀

州百戶賴恩

孫明忠彰義祠記余觀史策所載士
之以義烈見者肝可納血可藏猶誠

所激貫虹射斗感動天地二公一命之吏耳先登
陷陣奮不顧身卒使荆棘芟除鯨鯢剪滅鴈湖左
右人敦廉節家尚名教未必非二公之貞魂有以
啟之也李諱錫字天佑嘉善縣主簿贈嘉善縣知

縣河南登封人賴諱思字英華官百戶福建汀州人建室三楹整碑碣治廡除修門廡庀几筵神所憑依將
在是矣

魏公祠 舊嘉興府志在縣治東明崇禎二年為忠節魏大中及子魏學洧建

國朝雍正九年總督臣李衛重修

忠義節孝祠 忠義祠在縣治西學宮內節孝祠在縣治東思賢書院之前

國朝雍正四年知縣張鏞奉文建

海鹽縣

先農壇 在城南白苧地方

國朝雍正五年知縣王仕正奉文建立壇宇並置耜田

四畝九分

社稷壇 弘治嘉興府志在縣北門外西北一里開

濟鄉一都

風雲雷雨山川壇 弘治嘉興府志在縣南門外西

南一里甘泉鄉十五都

邑厲壇 弘治嘉興府志在縣北門外東北一里海
鹽鄉十六都

城隍廟 舊嘉興府志舊在縣南五十步元末燬明
洪武三年令劉朝英遷於縣西南二百五十步為
風潮傾圯永樂間令畢瑗重建成化中令李雲弘
治中令王公璽累加整葺

海神廟 海鹽縣圖經亦名龍王廟永樂三年左通
政趙居任築海鹽塘成建景泰六年僉事陳永叅

政謝輔重建於東門外海上

黃道廟 弘治海鹽縣志在縣西南四十五里激浦

南長牆山下

海鹽縣圖經長牆山之阿有黃道神祠寶慶三年郡運諸大卿請到廟額

稱顯應侯廟廟中有神曰楊太尉尤靈客舟渡海必禱之

太公呂望廟 至元嘉禾志在縣東一百五十步海

鹽縣圖經吳地志云太公辟紂居東海之濱百姓懷之為立廟後淪於海今鄉民立於甘泉鄉

尚胥廟 明一統志在海鹽縣西北一十八里祀伍

子胥及其兄尚

張寧尚胥廟碑伍公子胥以正諫被讒死史稱吳人憐之為立祠江

上命曰胥山海鹽開濟鄉去胥山二百餘里有尚胥橋浦橋而北有尚胥廟宣公將吳時代楚破越嘗經行其間而有按兵息民之澤歟公兄尚死於楚今橋廟之名及尚又豈以奔吳之謀尚實成之而懷德推本耶夫名久者其行必碩報重者其施必深公正氣在天地間宜有浩然獨存此廟祀所以愈遠而益不忘也彭孫貽伍胥祠詩伍胥祠廟鎖溪橋灌木千草夏自銷此地避仇空說劍只今乞食有吹簫東風芳草連吳苑南渡荒江盡浙潮羨燕種魚三徙客烟波一去五湖遙

秦始皇廟 海鹽縣圖經在縣南一十八里秦駐山

按吳地志云秦始皇廟失其建立年代時日董穀

澍水志曰今廟前有飄松一株伐去復生時顯戈
甲光怪之異

步公廟 海鹽縣圖經在縣南楊橋下元大德三年
建祀吳令步騭萬厯四十六年重建俗呼為步總
管廟

蘇驃騎廟 至元嘉禾志在縣西一百三十步萬厯
嘉興府志神名舉字子羽晉驃騎將軍封烏程侯
卒葬金牛山北劉宋高祖嘗夢其神因贈平南大

將軍

魯公祠

舊嘉興府志在縣南思魯橋之左祀宋令

魯宗道

海鹽縣圖經元姚桐壽云魯簡肅風範凜凜載在史冊每一緇誦未嘗不想見其為

人余始謁公祠祠旁有思魯橋壁端有卜筮詞凶吉如響柱上有聯云鳥去古祠留鳥翼名從青史識魚頭是縣令蔣行簡所書

岳武穆王廟

澈水志在千戶所公解左嘉靖癸丑

後倭寇海上屢至城下官兵悉力捍禦百戶余勲
郎舜臣默禱於王城上忽見神兵數輩約長丈餘

金戈鐵馬出入雲端自是師屢捷於是勲等因申
請建精忠祠以荅靈貺實戊午歲也

楊公祠 海鹽縣圖經楊憲使瑄築塘有功既卒民
祀之東門海塘上與龍王廟並萬厯七年巡撫徐
拭疏請移建二廟於白洋河上歲春秋有司致祭

傳詳
名宦

三公祠 海鹽縣圖經在楊公祠旁祀僉憲陳公詔
郡丞黃公清縣令饒公廷錫並萬厯七年築塘有

功者

英烈祠 嘉興府志祀嘉靖二十五年後倭變殉節

指揮馬呈圖滿朝采煉徐行健李元律姚弘千百

戶王繼隆姜楫楊臣薛炯宋應蘭王相呂鳳姚岑

康綬于岳

謹按祠址失考又按靖海紀畧薛炯作薛珙于岳
係諸生非千百戶時同殉者尚有王鏗邵鼎劉大
仲等並存其名

忠烈祠 舊嘉興府志在西門外一里祀明山東巡

撫都御史徐從治賜祠曰忠烈

傳詳忠臣

旌忠祠

嘉興府志在縣治東祀明給事中吳麟徵

傳詳

忠臣

國朝錄明代死節諸臣

賜謚貞肅

忠義節孝祠

忠義祠在學宮側節孝祠在安仁橋

南賓崙地方

國朝雍正四年知縣王仕正奉文建

石門縣

先農壇 在東郊距城三里

國朝雍正五年知縣呂廷鑄奉文建立壇宇並置藉田

四畝九分

社稷壇 嘉興府圖記在縣西素商門外

風雲雷雨山川壇 嘉興府圖記在縣南薰仁門外

運河東岸

邑厲壇 嘉興府圖記在縣北朔義門外運河西岸

城隍廟 嘉興府志宋在縣治西南隅明洪武十五

年知縣塗節徙置崇福寺西景泰間知縣郁綸嘉

靖間知縣丘岳重建年久傾圮

國朝順治十八年知縣李震重建康熙八年知縣杜森

竣工

何律王廟 至元嘉禾志在縣西三里嘉興府志明

洪武中重建

名勝志崇德何城有何律王廟相傳即吳王遣以築城者

馬鳴廟 石門縣志在縣西北三十里

廊世修馬鳴廟碑神裴姓

名璩唐廣明中官浙西蒲鎮會黃巢由溫寇浙公
力戰破之此上弗燬沒而廟食以報其功配饗者
為蔣都官佚其名則與公戮力者也新唐書逆巢
犯浙西時節度使裴璩斬其二長殲其黨甚衆賊
大沮喪乃詣天平軍乞降當巢所過千里無孑遺
而斯境得安堵如故微神之力弗及此矧捍患禦
舊式靈征伐自唐迄今有餘禩生則宣勞於牧
圉沒而介福於營鄉神之綏乂吾民始終如一日
也故於廟貌之成作迎神送
神之詩使工祝歌以祀之

忠勲祠 石門縣志在城隍廟東南明嘉靖丙辰建

祀宋趙忠定公汝愚

錢夢得重建趙忠定公祠記
吾鄉忠定趙公以天潢懿親

夾輔宋鼎誕生於洲錢民舍故里曰生賢巷曰探
花猶昭昭在人耳目祠舊在祗園寺嘉靖間胡中

丞毀諸寺觀祇園賴有公祠獨不毀意其舊尾山
河鬼神呵護亘古今不可湮沒歟今祇園梵宇金
碧輝映而公之椽桷几筵化為烏有矣念夫緇衣
錫杖猶思克紹衣鉢而章縫衿佩顧獨無高山之
仰耶斯侯捐俸首倡使邑中好義者
翕然樂助以共成此祠也意在斯乎

四君子祠 嘉興府志補在邑庠內明倫堂東與傳
貽書院相對弘治間知縣趙希賢立以祀輔廣鮑
恂朱逢吉沈貴

蕭尚書廟 至元嘉禾志在縣東三十里舊嘉興府
志元蕭穆拜尚書後封蕭王祀此

蔡烈婦祠 石門縣志在玉溪鎮南明嘉靖間郡守

趙瀛建仍給祭田

傳詳列女

忠義節孝祠 忠義祠在學宮東射圃左側節孝祠
在傳貽書院左側

國朝雍正五年知縣呂廷鑄奉文建

平湖縣

先農壇 在東郊二十一都己字圩

國朝雍正五年知縣楊克慧奉文建立壇宇并置耤田

四畝九分

社稷壇 舊嘉興府志在西關外西林寺西

風雲雷雨山川壇 舊嘉興府志在南關外演武場

東

邑屬壇 嘉興府圖記在縣北一里許

城隍廟 弘治嘉興府志在縣治東一百五十步宣

德五年設縣新建成化十六年知縣李智用所起

藏錢買地廣二丈許直南為神路重建堂廡門額

顯濟廟

嘉靖浙江通志在縣東南三十里宋大觀

三年建山半有龍湫其上有龍母塚旱禱即應宣

和中賜額顯濟崇寧中封淵靈侯明去侯爵稱陳

山之神

龔頤正顯濟廟記乍浦之陳山有靈湫居山之半水旱不溢不涸山有盤陀大石歲

三月十有八日吳之陽山及此多雲霧雷雨晦暝之變俗傳為白龍君以是日生於陽山而歸藏其母於此山也故祠事甚嚴州邑旱潦致禱酌酒石上有物蜿蜒即見崇寧三年部使者以聞詔以顯濟名其廟宣和五年始封龍君為淵靈侯紹熙元年四月不雨至於六月睢陽李直養以才薦畀令事巫走祠下俄有蜿蜒舉體金色見神座上直養迎挹即循其左臂而上至中樞因請歸醮祠復循

而上如初。奎中四龍子如衆閭境驚異。見所未有。
閱三日大雨。霑洽是歲。詔進封龍君為廣惠淵靈。
侯龍母為慶善夫人。命綽既下神報。益彰明年三
月。直養以祠宇。敗撓弗稱。神施遂哀。聚力為述。
大殿鼎新。設像且列四神像於後。以表四龍子之異
蹟。正祭拈比次如左。而系之以迎享送神詞云。海
波淵淪兮。海山巖嵒。其下潛通兮。神之宮時。思其
母兮。來春容葛藟生兮。杏帶融神之來兮。雷隆隆
雨我田兮。秋芄芃芃我之懷兮。無初終神稅駕兮。芬
陽斯陳。鼓鍾廟宇兮。列鼎重茵。神之宮兮。屯雲蔥
有蒸兮。芬芬我黍我稌兮。抑亦薦其萍芹。神明其
衷兮。無吐芳新吹洞簫兮。望極浦神之歸兮。雲在
下十風兮。五雨祐我海邦兮。汗菜斥鹵神
不來兮。使吾心苦千秋萬歲兮。為民所祐。

齊景公廟

明一統志在平湖南一十三里

開窗括
異志齊

景鄉縣北四十里有廟在焉圖經號齊景公廟一
云朱明大王古老相傳齊景公遵海而南觀於轉
附朝辭曾遊於此立廟於
斯舊有碑今磨滅不存

三將軍廟 舊嘉興府志在梁莊祀齊田榮田廣田

橫

馬維銘募建三將軍廟疏吾邑梁莊故有三將
軍廟三將軍者為齊義士田橫橫兄榮廣夫吾

邑隸吳去齊境二千里梁莊隸吾邑即濱海乎去
橫之島何啻二千里而遙夫亦謂神則無所不之
乎議斯其廟重神也亦重義也惟義故雖死而凜
然有生氣神之所以無方也居茲土者尚其以義
焉 勗

顯忠廟 嘉興府圖記在縣治東一里當湖旁祀漢

大將軍霍光閩人英烈錢侯附焉嘉興府志霍廟

一在海鹽東北廣陳鎮元至大二年建一在當湖

市宋建炎三年建並析屬平湖

魯唐顯忠廟碑記吳主孫皓當被疾

時有神降於小黃門云華亭鹹塘風濤為害非人力所能防古海鹽縣治一旦陷為湖無大神護臣

漢之功臣霍光也臣部黨有力當鎮之可免翼日疾瘳立廟小金山竊嘗謂生為偉人則沒為明神

必有大功德於民隨其所向而世奉祀之惟公策名孝武擁昭立宣厥功懋焉是時漢都長安距吳

會遠甚又公之歿更兩漢厯三國已數百年乃托吳王之疾肇建金山之祠如月在天有水則現曾

何久且遠之間耶宣和二年始賜額曰顯忠後三年封忠烈公趙孟堅英烈錢侯廟銘博陸在漢擁

昭立宣雖曰世祿不吾以延逮及異朝血食廟祀
為崇提封叱捍潮水無使侵蓄虧厥疆里至於今
世靈畏若存英烈錢侯起身七閩浮舶而商至禮
英靈惟公與直志合心傾一誠默孚旋隸部下拱
立廟廡杳然冥化東海之瀕奉祀畢虔位號封崇
若有待然小醜不競東鄙興師惟侯助順若響之
隨神兵千萬陰雲擁之寇勢旋靡電掃風披昭靈
顯功褒號英烈服爵儀衛一變錦蕞我儕銘石匪
事誇雄寓勸若人知孝而忠李東陽霍氏行祠詩
霍將軍古祠下揚靈旗躍靈馬神遊四方遶余野
霍將軍武且神驅逐厲鬼鞭風雲生能安邦死能
福我民壯哉將軍死猶存沈懋嘉霍氏行祠詩花
街東畔是儂家閒看迎神放晚衙拂
拂紅旗春賽罷霍王祠下抹藤花

馮將軍廟 弘治嘉興府志在縣治南十五里宋端

平三年建漢陽夏侯異之廟也

白沃使君廟 嘉興府圖記在縣治東北三里許

間窗

括異志故老相傳當湖初陷時白沃使君躍馬疾走不及遂駐馬以鞭指得湖東南一角水至不沒今此地獨高後人於此立廟一在沙腰一在乍浦皆稱白沃廟也

景賢祠 平湖縣志在德藏寺東祀唐相陸忠宣公

贊以宋靖獻先生陸正明徵士陸宗秀程鄉令陸

銀太子太保吏部尚書謚莊簡陸光祖配歲春秋

仲月祭

范惟一景賢祠記嘉禾祠宣公者四其一在東湖而廣陳之陳山有靖獻先生書院

嘉靖甲寅合宣公與靖獻祠馬題其額曰景賢又七年有司議以徵君宗考程鄉令鉉入祠配享予按唐書宣公為蘇之嘉興人宋以嘉興隸浙西路而宣德間分鹽官地置縣平湖故陸氏今為平湖人宣公之功在唐社稷而靖獻徵士程鄉諸公又皆能世其德合而祀之固宜

天妃宮 嘉興府志在乍浦苦竹山妃閩莆人宋都

巡檢林愿女生而神靈沒為海神歷代累封至天妃洪武永樂中兩加封號凡邊海處皆祀之

忠獻祠 舊嘉興府志在東十八都盤字圩里名兼

葭園祀宋張魏公浚南軒栻南陽判官溥

張治洪宗祠記

自忠獻公六世孫淮揚通判德夫遷居於湖處士
靜菴自獨山繼遷兼葭園子孫保聚於斯構祠以
奉忠獻公暨右文殿修撰公德夫靜菴二公歲在
庚辰登仕郎完初構椽而落成之庚戌治洪謀之
叔伯宣形先兄介眉朗辰共捐
田瞻享立碑宗祠撮其要云

陸氏先正祠 舊嘉興府志在東城內祀象山先生

報功祠 天啟平湖縣志在兵備司左為禦倭都御

史胡宗憲立以禦倭郡守劉慤邑令劉存義配

馮汝

鄉報功祠記嘉靖丙辰總督軍務都察院右僉都
御史梅林胡公穢海寇於平湖南郭士民懷公再
造功謀諸邑令陳君一謙建
祠立碑以垂不朽屬余為記

羅侯祠 天啟平湖縣志在南司左為知縣羅尚忠

立

陸莊簡公祠 舊嘉興府志在南司右祀陸公光祖

懷德祠 平湖縣志在佑聖宮西

土世貞懷德祠記懷德祠者祠故諫

議平湖馮公公為德於其鄉三老徐燮等請於令願特為祠以報公公居恒謂家居不習計倪不可饒不饒不可以伸志夫人富而仁義附焉故奉美即以叔棄田而治之皆成上腴又以其田入益作直傍畝亡何邑田皆驟貴於是公喜曰吾可以為德矣其首施則伯仲子姓次施則五服之親屬最後施則邑之老者疾者無子者不能緇者叩之即響應又推其餘饒梁城修土石堰十五石橋三十

二浚陳塘為里二十七人環公居而家者可十萬戶大半食公惠其自罷官至捐館三十四年如一日公諱汝弼官揚州郡丞

忠義節孝祠 忠義祠在學宮西節孝祠在治西太平橋之東

國朝雍正五年知縣楊克慧奉文建

桐鄉縣

先農壇 在東門外常平倉舊址

國朝雍正五年知縣王輅生奉文建立壇宇並置耜田

四畝九分

社稷壇 弘治嘉興府志在城隍廟右去縣治西北
二百二十步許

風雲雷雨山川壇 舊嘉興府志在縣治東南一里
邑厲壇 弘治嘉興府志在北門外去縣治二里許
城隍廟 嘉興府圖記在縣西北一百八十步宣德
末知縣趙中建天順初知縣張泰修

索度王廟 正德崇德志即青鎮土地神鎮人飲食

必祭水旱疫癘必禱咸若有答

萬圭索度王廟記
青墩有土地神祠

居密印寺之東號曰索度明王世祠茲土名位世
次不見於載述宣和間起居舍人周離亨謫蒞鎮
事一夕夢有神人謁之曰予居敝陋幸惠顧我翼
日周訪諸叢祠得王之像適契夢中所見者因為
修祠宇獨不為記以傳於後今考諸鎮西南隅有
古山廟神曰索靖唐咸通中朱洪所記索靖王者
實三國吳王孫權之仲子也按吳書吳王之子七
人本傳所稱乃吳王第三子而洪以為仲子不知
何據今父老所傳或言王與古山廟神隸茅也或
言王即索靖王姑叙其大槩以俟後之博識君子
而參訂焉

昌武大王廟

馮李詩繫廟在皂林鎮吳士季為吳

興令病瘧遣人就此乞驅鬼夢一騎縛小鬼去即
愈宋志淮海王有三子皆有功於民因祀為土穀
神皂林為大龍翔為二爐鎮為三云

昌武三王廟 嘉興府志宋淮海王第三子廟在車
溪九里松之西至和元年五月大風雨擁廟入水
漂至車口堰北四里而止感夢於密印寺僧仲翔
告以欲遷里人驚異以是年重建故云下廟

顯靈廟 桐鄉縣志在爰山宋寶慶元年建封周顯

靈王祈禱者甚衆

程都御史祠 嘉興府志在北門內祀明建文時殉

節僉都程本立

宗將軍祠 桐鄉縣志在皂林鎮秀溪橋

張定志宗將軍祠碑

將軍諱禮嘉靖丙午倭寇入犯所至蹂躪將軍奮勇而前禦寇於皂林市之三里橋三覆賊兵斬首四百餘兵興以來稱血戰第一功今日祠之蒼赤詎非將軍所遺哉廟食茲土而家尸尸祝亦不負將軍一死矣

胡總制祠 嘉興府志在城隍廟前祀總制胡宗憲

萬禾胡總制祠田記嘉靖三十五年倭寇圍桐鄉軍門胡公策解其圍民建祠肖陳醫生姚崑謂有祠無租祠何以守倡捨已田一十五畝以膳守者樹碣祠中名其冊曰報功田

三公祠 桐鄉縣志在城隍廟間壁祀阮公鶚王公三錫金公燕載入祀典

忠義節孝祠 忠義祠在儒學內節孝祠在縣東南司前

國朝雍正六年知縣蔡可遠奉文建

浙江通志卷二百十九

欽定四庫全書

史部

浙江通志卷二百二十一

詳校官給事中_{臣戴璐}

檢討_{臣德生覆勘}

總校官編修_{臣倉聖脉}

校對官中書_{臣石鴻緒}

謄錄監生_{臣史廷爽}

欽定四庫全書

浙江通志卷二百二十

祠祀

四

湖州府

烏程縣

附郭

歸安縣

附郭

先農壇 在東郊

國朝雍正五年烏程縣知縣王懋訥歸安縣知縣王錫

年奉文建立壇宇并合置藉田九畝八分

社稷壇 萬厯湖州府志在迎禧門外

風雲雷雨山川壇 弘治湖州府志在定安門外一

里許洪武二年置

郡厲壇 歸安縣志在臨湖門外烏程歸安同祀

城隍廟 弘治湖州府志在阜安坊東宋紹興間在

阜安坊西知州事趙叔涔建洪武二年從今處正

統二年通判楊和重建成化五年知府勞鉞鼎建

一新湖州府志萬厯七年知府栗祁重修

烏程縣城隍廟 崇禎烏程縣志烏程城隍之神忠

靖王相傳為唐張巡廟在縣治東數武而近洪武

七年知縣孫成建嘉靖三十三年知縣張冕始正

廟制三十六年知縣蔣宏德重修隆慶元年知縣

趙煥復建後寢萬厯間知縣楊應聘徐應鶴陳經

正屢修天啟五年知縣馬思理重修

歸安縣城隍廟 歸安縣志廟在泰定倉後宋嘉定

欽定四庫全書

湖州府志
卷二百二十

四十年知縣葉恩始正廟制

黃龍洞神祠 萬厯湖州府志在郡城北十八里弁

山之陰舊名金井梁貞明初有黃龍見易今名歲
以五月二十日致祭

吳季子祠 歸安縣志季子墓在江陰縣暨陽鄉孔
子所書十字碑在焉今歸安之射村亦有季子祠
西楚霸王廟 烏程縣志初在子城內梁天監末太
守蕭琛始遷於秦勝門歸安志云陳高祖永定二

年遷縣北二里祠曰霸王廟按唐垂拱四年安撫使狄仁傑檄告楚王遣使焚祠父老以存廟請仁傑齋宿廟中夜夢神言自國家起義兵以及征討

吾嘗以陰兵佐今以功獲焚奈何仁傑許其完葺

以禮祀奠如故

顏真卿項王碑陰述西楚霸王當秦之末與叔梁避仇於吳中蓋今

之湖州也雖滅秦而宰制天下其魂魄猶樂茲邦至今廟食不絕其神靈事迹具竟陵子陸羽所載圖經大厯七年真卿蒙刺是州十二載奸臣伏法恩命追真卿上都尅期首路竟陵是諡予以故碑顛趾嘗因仍草莽已而復之真卿廼命再加崇樹以紀之時則仲夏方生明之日江總卞山楚王廟

欽定四庫全書

卷二百二十

詩頻藻祈明德倚棹息巖阿忽聽烏鳴曙非復楚
宮歌聞堦蘿宿莽古木斷懸蘿惟堂寂易晚桴鼓
自相和廟祀流百
世英威言幾何

通靈王廟 名勝志在治南長橋下祀漢銅官山趙
監漢吳王濞時令監督胥靡鑿山採銅不忍虐民
之力石壓而死故祀之同光中封通靈王

徐孺子廟 湖州府志在孺山祀漢南州高士徐穉
穉嘗哭友人冀州刺史姚元起於此故祀之

張羽
高士

廟詩晴明出遊覽南山一登厯上有高士廟淒涼
倚空碧殘僧散已久客至空歎息憶昔漢祚衰朝

野方奔迫遂辭東湖墅艤棹此山側高明懸日月
千古留遺跡洪州有高亭吳楚千里隔側身西南
望悲風
起悽惻

靈濟廟 烏程縣志在縣北報恩觀右祀廣德祠山
之神神姓張名渤後漢人初居邑之白鶴山有治
水功於廣德顏真卿碑載其事唐乾寧中邑人立
草堂祀之宋知州徐鐸始遷今所明正統間通判
楊和重建

關帝廟 烏程縣志在毘山明尚書潘季馴建

董份
關帝

廟碑始少保公以大中丞治河既築堰又築旁堤二千餘丈堤既就矣而中有龍門未合神顯靈示之夢既寤則堤上人詳傳有神像漂至亟興而致之宛然夢中所見也少保志本堅會有神符其銳益甚期以五日報成夫一淮揚也始則河決百里固天下非常之大變繼則堤成五日尤天下非常之奇功少保所以感神貺而不已也蓋少保業已奏請立廟淮上又捐貲而叛廟毘山馬毘山在湖郡東北湖受天目萬山之水而此山鎮之今復鎮以神廟而湖世蒙其庥可知也因并著之

郭尚書祠 萬厯湖州府志在歸安縣治東文昌宮

巷祀晉尚書郎郭璞太康間璞有遷城之功故祀之歲以春秋二仲月致祭

四賢堂 湖州府志在子城東鎮雪樓之下宋淳祐

間知州事高衡孫建祀晉內史王羲之太傅謝安
唐刺史顏真卿宋知州事蘇軾以四公嘗為郡守
故祀之

德貺廟 名勝志在府治西南祀梁尚書沈約俗呼
地主廟

三賢祠 萬厯湖州府志在峴山正德十二年建祀
唐顏真卿宋蘇軾王十朋歲以春秋二仲月致祭

顏魯公祠 萬厯湖州府志舊在駱駝橋東後徙於

府治西北嘉靖八年知府萬雲鵬復遷於府學尊

經閣之左歲以春秋二仲月致祭

王十朋顏魯公祠詩卞山苔溪

高且清魯公祠堂貌如生言言千古英雄在吉吉一點仙丹成奸臣必欲置之死天下不敢呼其名

當時節義誰可並常山太守公難見

沈將軍廟 名勝志在昇山祀唐婺州刺史沈清大

厯中李希烈陷汴州清發兵昇山至汴力戰而死

故祀之

烏將軍廟 名勝志在烏鎮宋紹興間累著靈異勅

立祠萬厯湖州府志將軍烏氏重允之族子史失

其名李琦反力戰而死故祀之

莫淵烏將軍廟碑記茗溪東九十里

有鎮曰烏鎮而鎮有祠曰烏將軍廟按五季鄭蟠
吳興鏡見錄載吳越錢鏐遣兵戍烏程之東九十
里以立一障謂之烏戍神炳靈彰異於捍患除災
屬鎮之人獲賴其庇祠前有池名上智潭劇旱不
枯淫潦不溢若夫神之世系史佚其傳里居亦不
可攷故老傳聞謂烏侯明總戎南討至車溪而
沒裨將吳起就墓於池之西
北偏創祠於池右儀象備焉

胡安定先生祠 湖州府志在府治西北觀德坊歸

安縣志宋胡瑗教授湖州熙寧五年郡守孫覺請
建安定書院元至正間郡守許師可復新而大之
明宣德初都御史熊槩重建二十世孫守恒忠孝
樓在焉春秋致祭

國朝雍正九年總督臣李衛重修

東坡蘇公祠 萬厯湖州府志在駱駝橋東顏魯公
祠中宋淳熙八年蕭德藻撰祠堂記今廢崇禎烏
程縣志在弁山黃龍洞公嘗禱雨於洞去後就山

建祠

張睿卿復東坡先生祠堂記東坡先生元豐二年四月二十九日移至湖州至八月徵赴

御史臺在郡僅九十日耳嘗禱雨黃龍洞賦詩刻石先生所至有專祠在江南則秀之三過堂常之似蜀堂抗之孤山堂繪像俎豆宛然如生我湖峴山與顏清臣王梅溪兩公參祀專祠則缺甚疑之萬歷二十年余遊黃龍洞於灌莽中得礎石模糊剥落似有款識令童洗剔額篆有東坡蘇公祠堂碑記八字豈淳熙八年蕭德藻所撰耶文漫漶不可讀移置觀後余始知湖之專祀先生在弁山因為繪像位之左堂置山下田三畝畀道士歲薦菊泉續昔人就山專祀之意

協順廟 歸安縣志在縣東南石塚村祀宋陸圭淳

祐中封廣陵侯賜廟額

詳見杭州府祠祀

曹孝子廟 萬厯湖州府志舊在府治西北嘉靖八

年知府萬雲鵬復遷於府學尊經閣之右

西吳里語名曹

清烏程人父嘗殺人繫獄清自誣手刃代刑其尸
湖流至家中西陽村邑人廟祀有祈輒應宣和初

清溪關

保障之功因以上聞錫封賜額今

德清有昭應侯廟郡守又祀於府學尊經閣之右

以配顏魯公祠

忠孝並列云

安吉太守祠 萬厯湖州府志舊在府堂左嘉靖十

二年知府陳讚遷於愛山臺之上祀宋安吉州知

州趙良淳

張文昱趙侯祠記趙侯當宋末來守是
邦元兵渡江知勢不可為即與家人訣

書几上有夫婦俱死節義成雙之句於是佩印綬焚香南向再拜夫婦同縊於郡後之集芳軒邦人義之為立祠茲踰百禩祠宇傾圯洪武二年春太守襄陽楚公易腐塗剝輪奐一新

謹按宋末殉節者安吉太守趙良淳自縊死浙西提刑徐道隆與子載孫赴水死池州通判趙卯發與妻雍氏同縊死史傳較然乃舊志牽合云良淳與夫人雍氏同縊死長子載孫亦赴水死而張文呈及牟應龍碑記俱云夫婦同死節義成雙傳訛踵謬是不可以無辨或夫婦同死而非雍氏闕疑也可

吳總管祠 歸安縣志在雙林太平橋祀吳憲卿行
千一元元貞二年以贛州戰功授朝奉大夫歿後

贛蔡五九作亂浙江平章張驢討之忽空中旌旗蔽日有吳師千一字兵聲大振贛遂平上其事於朝仁宗封憲卿為總管至正三年於本里立廟肖像祀之

袁侯祠 崇禎烏程縣志在峴山為知縣袁光宇建

傳詳
名宦

清遠遺愛祠 崇禎烏程縣志在南塘對峴山祀知

縣馬思理

傳詳
名宦

忠義節孝祠 烏程縣忠義祠在尊經閣之左節孝

祠在布政分司舊址歸安縣忠義祠在明倫堂東
節孝祠在月河鋪

國朝雍正四年知縣王懋訥王錫年奉文建

長興縣

先農壇 在縣治東白烏區十四庄

國朝雍正五年知縣白環奉文建立壇宇并置耜田四

畝九分

社稷壇 嘉靖長興縣志在長安門外西北

風雲雷雨山川壇 湖州府志在嘉會門外

邑厲壇 長興縣志在吉祥門外

熊明遇長興縣厲壇記天下邑治必

祭鬼於北門長官一歲三就壇而虔禮焉熊子令邑之二年遷之於廣福寺西偏取陰道徑官而僻庶幾三代擇木之修茂立為最位遺意也子產曰鬼有所歸迺不為厲吾為之歸也無厲矣

城隍廟 長興縣志舊在縣治東南二百步洪武三

年創建於縣治東南靈佑坊每歲春秋二仲月致

祭弘治四年知縣楊埕一修嘉靖末知縣歸有光

重修

國朝康熙十一年里人捐貲重修增建樓房

吳夫槩王廟 弘治湖州府志在縣東二里夫槩嘗
於此築城後人因以立廟

錢卿廟 西吳里語在縣治西北四里彭祖四十六
代孫朔字幼子漢建武中為黃門侍郎代郡太守
卒有靈永平七年立廟柯里村置吏十人供其灑
掃

謝太傅廟 萬厯湖州府志在縣西南三鴉岡祀晉

太傅謝安嘉靖十二年知縣黃光昇修

顯應廟 弘治湖州府志在城西一里五峯山神姓

李名祿字福公世居童庄宋大觀二年正月十八

日生赤光照室里人驚異宣和七年沒於海陵之

赤岸其靈始顯於兩淮播及江浙縣令趙子卓上

其事於朝勅封太尉寶慶二年封威濟侯累加靈

惠廣佑福濟忠正王元至順間加英烈二字

吳興掌故

史彌遠廢濟王潘丙潘壬被誅因欲屠湖州夢中見李太尉求免遂追回大統制一城生靈俱拜更生之德長興至今敬事之

忠武祠 嘉靖長興縣志在演武場北知縣石有恒

建以閱武因祀大元帥長興侯耿炳文以副元帥

劉成廣威將軍周淵並祀

石有恒忠武祠碑記長興侯耿公百戰存城功

而無祀斯豈非典之缺哉予建亭講武嘗置忠武堂於後以祀公一時與公戮力茲土者有劉將軍之死事周將軍之宣勞歲時祀公以劉周為配

貞烈祠 長興縣志在子山下知縣熊明遇建祀姚

光裕未婚妻周氏

傳詳列女

忠義節孝祠

忠義祠在學宮側節孝祠在縣治西

南一里

國朝雍正五年知縣白環奉文建

德清縣

先農壇 在東郊三里塘

國朝雍正六年知縣崔宣奉文建立壇宇并置耜田四

畝九分

社稷壇 弘治湖州府志在縣治西北一里

風雲雷雨山川壇 湖州府志在廣儲門外

邑厲壇 德清縣志在禮辰門之北

城隍廟 德清縣志在儒學之左宋紹興中重建明

正德末知縣陳愷改修前殿

名勝志廟有古井相傳乃蜃出沒之穴父

老載土塞穴以神像鎮其上舊記謂其首枕祠壇尾抵虹橋宋景定間監稅吳澄坐務中忽見蜃浮於溪上黃目巨鱗牛首無角須臾乃沒

惠應廟 萬厯湖州府志在縣東北梅林村祀漢鉅

鹿太守魏霸水旱疫厲有禱輒應宋建炎中金人
犯境大著靈異嘉泰三年賜今廟額

永靈廟 萬厯湖州府志廟二俱在新市鎮祀晉里

人朱泗

陳錢永靈神號加封記縣有鎮名新市其
土神朱泗郡人也墓去鎮東北三里耆舊

相傳侯當晉懷帝朝為將有功殉忠死敵廟食此
土周廣順中始封保寧將軍紹興五年賜永靈廟
號九年改封顯佑侯至慶元二年又因縉紳士庶
言侯自方臘金人之亂屢顯威靈耀兵却敵使寇
不入境且數十年水旱疾厲之祈應如響答即其
功惠法當贈封於是賜為顯佑通應侯元配邱氏
封協惠夫人其年八月綸誥初下鎮人驩迎大合
樂具酌獻誦祝冊以告神已而隴石於廟門屬寓

客陳錢為文以記其事沈戩穀重建永靈西廟碑
記咸寧五年故吳大司馬右軍帥朱然弟煦從軍
司馬氏伐吳轉戰至市誕神於市之施家巷命名
曰泗志本泗人也復從軍敗石勒於葛陂永昌元
年冒陣死王敦之難泰寧二年封鎮國大將軍降
夢立祠於所誕之地即今廟也宋元祐間鎮東人
以走祀不便請分建東廟廟始專名為西今祭亦
專得秋祀云正德六年僉事陳水南先生與鄉貢
童遷倡議重修踰百四十餘年為歲之丁酉廟復
圯里之好義者捐資撤而新之自十月十六日興
工戊戌某
月日落成

餘不亭侯廟 嘉靖浙江通志祀晉車騎將軍孔愉

廟在餘不溪上歲春秋祭

德清縣志縣西南城山之陽復有孔侯廟按餘

不志乃孔侯墓之祠堂後人因以為廟耳廟後大塚磚甃半露孔愉所藏也古木數株堅如鐵石

孚惠侯廟

弘治湖州府志在縣北永寧鄉新塘廟

記云神姓陸名載從宋武帝平關中陷赫連氏魏太武平赫連因仕魏為中山郡守其後累世忠孝神靈應頗多新塘人事之甚嚴隆興元年賜孚惠侯廟額

織簾先生祠

嘉靖浙江通志在吳羌山祀南齊徵

士沈麟士

傳詳隱逸方日乾拜織簾先生祠堂詩第一溪山裏先生半畝宮石泉餘古色

松韻想高風鐘鼎名安在山林道
未窮纖簾良獨苦相慰有鳴蟲

昭應侯廟 德清縣志在市亭山麓祀曹孝子清

三賢祠 萬厯湖州府志在新市鎮祀宋顯謨閣學

士劉光祖左丞相吳潛右丞相游似德清縣志三

賢俱於新市里居立祠以祀

陳霆三賢祠記嘉靖丙午十月新市鎮作

三賢祠成三賢有位於宋聲光流聞易世未泯寓
則里賢論維鄉秀而社祭罔秩禮典之缺不其甚
歟初章印謝公九儀來為邑請之當道俾祠以祀
去之十年公來司臬詢之尚缺如也則檄馮尹煥
趣成之大規甫就而公以入賀如京餘工載情明
年僉憲渝川譚公榮持節行縣謂茲義舉罔終曷

勸矧文節清獻允吾蜀賢尊鄉協
義吾敢不勉乃斥贖鍰散縣歲事

東萊先生祠 萬厯湖州府志在慈相寺月泉亭之

上祀宋呂成公祖謙

謝夢生東萊讀書堂記縣北行數里有山曰石壁壁之傍

有寺焉曰慈相舊傳東萊呂先生與南澗韓公讀書於此乃敞三楹扁曰東萊讀書之堂胡麟生東萊先生讀書巖二首先生讀書處片石許誰分虎
肅前溪月僧歸古寺雲泉香深裏得松落靜中閒
夜夜山窗畔還疑燈火勤寄跡荒山寺藜輝乙夜
分泉清疑煮雪月朗見披雲客夢經春發鐘聲向
晚聞千年著作
在應不惜辛勤

保濟顯佑侯廟 德清縣志在縣治溪東侯姓戴諱

繼元字承祖邑之焦山人延祐二年邑人以清明
祈年張水嬉時溪流湍漲舟競而覆侯奮身援之
人皆獲免而侯溺焉逾日屍逆流浮於所居之地
里人即其遺蛻塑像立廟威爽大著元封顯佑侯
湖州路總管

國朝雍正八年

勅封保濟顯佑侯署縣事錢學洙倡捐重建

錢學洙重建保濟顯

佑侯廟碑記清溪向為德邑之巨浸其源發於天
目自臨安餘杭錢塘武康諸溪之水合流而匯每

當霖雨輒苦泛溢於是築堤為障名曰陰塘藉戴
侯之靈不致沖潰界西萬頃之民田德武兩邑之
漕艘實欣賴焉按志侯諱繼元字承祖邑之焦山
人生於宋嘉定間敦孝弟務正直為鄉鄰重延祐
二年以拯溺委身浮屍潮流里人懷其德感其異
遂塑像立廟崇奉溪濱威靈大著元封顯佑侯湖
州路總管明嘉靖間倭寇臨城邑人震恐遙望山
巔旗幟浮空寇遂驚逸萬厯戊申洪波驟至侯現
身若排決狀水勢得平今雍正四年水決塘堤遐
邇居民夜見火光神力陰攝賴保安全祭法云能
禦大菑捍大患則祀之其侯之謂歟恭逢

聖天

子懷柔鉅典凡江海福神皆邀

覃恩封祭前令倪琯因紳士之請援吳行人伍公之例
具詳各憲總制李公題請褒封

旨下部議適前令奉調禹航庚戌四月學洙奉檄來令
茲土謁廟時見規模卑隘垣宇坍塌因俯順輿情

倡捐改作衆志感孚踴躍樂輸鳩工庀材羣萃輻
湊本年八月奉

旨加

封保濟顯佑侯春秋致祭欽遵製造神牌躬率寅
僚及所屬士民恭送入廟而廟工適竣巍峩弘敞
視昔有加赫聲濯靈顧瞻如在惟侯之功德足以
感動乎人心是以羣情鼓舞俾斯廟速成為德邑
保障焉
是為記

三侯祠 德清縣志在分司之右拱乾樓側宋侯興

祖字汝傑萬厯癸未進士蜀中江人熊侯德陽字

龍光萬厯丁未進士江右建昌縣人周侯宗建字

季侯萬厯癸丑進士江南吳江人三侯迭繼循良

並著卓異邑士民思之立祠

忠義節孝祠 二祠俱在縣東官地

國朝雍正四年知縣崔宣奉文建

武康縣

先農壇 在縣治東門外東郊

國朝雍正六年知縣李徵熊奉文建立壇宇并置耜田

四畝九分

社稷壇 弘治湖州府志在縣治西北一里

風雲雷雨山川壇 湖州府志在縣治西南二百步

邑厲壇 武康縣志在縣東北一里

城隍廟 武康縣志廟舊在縣西今在縣東一百步

明洪武三年縣丞丁憲即淨因院建

國朝順治五年知縣姜會昌重修

淵廉廟 嘉靖浙江通志在縣西響應山下相傳山

有碧玉潭神龍所居唐元和八年令劉訥禱雨而

應因建廟祀之宋元符初賜今額

防風氏廟 萬厯湖州府志在縣東南封禺二山之

間祀防風氏之神歲以八月二十五日致祭

吳康侯封

山記封禺二山之間古汪芒氏之封國即防風也去武康縣東一十八里為其封守之地故曰封山唐天寶六年更名防風山又曰封公山封山麓為防風廟晉元康初邑令賀循建吳越王錢鏐微時禱有驗後封靈德王其碑碣猶存洪武四年勅封防風氏之神至今都人士封羊醢酒有司俎豆而祀之歲一舉焉

舞陽侯廟 吳興掌故在上柏里祀漢舞陽侯樊噲

按沈彬廟記謂噲故上柏里人從季母嫁沛人遂

為沛人云嘉靖浙江通志今廟地尚名樊宅

郭先生祠 萬厯湖州府志在縣郭林村祀晉隱士

郭文

武康縣志祠南有橋名郭林西
有山名招賢皆文遊息之地

貞曜先生祠 武康縣志在縣西懷安門外二里地

名孟宅保即東野孟郊舊居有井曰孟井

靈應廟 弘治湖州府志在縣南二百步神姓徐諱

天佑宋時縣人武康縣志淳熙間有火災知縣方

導見神撲滅之後屢著靈應寶慶三年封孚濟侯

賜廟額靈應

王公祠 武康縣志公名懋中祠在縣東豐橋里邑人助有祠田每歲九月初六日致祭

忠義節孝祠 忠義祠在學宮東偏節孝祠在學宮西偏

國朝雍正五年知縣李徵熊奉文建

安吉州

先農壇 在州城東郊百家園

國朝雍正六年署知州事曹儀奉文建立壇宇并置耜
田四畝九分

社稷壇 安吉州志在西門外半里

風雲雷雨山川壇 湖州府志在南門外半里

州厲壇 湖州府志在北門外半里

城隍廟 嘉靖安吉州志在州東南一百二十步

黑龍潭廟 弘治湖州府志在治西三里龍潭之上

每歲旱禱雨輒應封孚濟侯

吳太子廟 嘉靖安吉州志在州南五里吳赤烏十

三年廢太子和處故鄣卒因立廟於此

朱明府廟 湖州府志在州西五里祀吳揚州別駕

偏將軍朱紀

施明侯廟 弘治湖州府志在梅溪鄉神名彬晉征

西大將軍尚書左丞封中蠲侯謚明食邑本縣遂

立廟以祀

古枕志宋紹興間朝廷毀淫祠文移甫至太守夢安吉人來訪問其姓名曰中

蠲侯施彬也請曰某自晉血食鄣南今幸庇護既覺不知所以越數日知峽州朱三思進謁守知其

為安吉人質以所夢朱
以廟對宇大異之獲存

輔世忠烈王廟 萬歷湖州府志在州西落石山下

祀唐衛國公李靖

沈樞輔世忠烈王廟記王姓李氏諱靖字藥師京兆三原人也

唐武德中輔公祐據丹陽以叛詔王副趙郡王孝恭東討一戰而擒之安吉舊隸丹陽巨盜既平邑人感王之德廼即邑之西山塑像立祠奉祀惟謹歲或乾溢禱於祠下雨暘輒應自唐距今已數百年趨王之庭丐王之庇者如祠之初也攷其賜額封侯始於政和自侯而公始於隆興然王封衛國公見於生前矧鄭之管城舊有祠已封王爵故乾道五年邑之士民援是以有請者再馬按管城之祠載於國朝會要其立也迺後魏賜僕射李冲之陂因陂為名而容臺異議執疑似之說以沮其請

是時樞為宰掾因討論而辯明之且引宋祁題李公廟詩以為據其詩曰斯人天挺傑賊膽畏膏盲其卒章曰血食雄京輔於今異姓王即是以觀則豈得以僕射李冲之祠為疑哉朝廷以樞言為然且檢會要本朝祀典推崇有加自建隆至開封王爵已加忠烈今答靈應宜以輔世忠烈為廟號綸誥既頒邑之雅羞歡呼鼓舞舉手加額以相慶於是神之宏休愈久而愈光矣范天輔李公廟落石記元泰定己丑暮春之初其日乙巳風暴雨甚雷轟電掣沙揚磔飛聞有聲自山巔來者視之乃石也砰礧礧砥直下數十百仞竟止行慶右偏棟宇像設一無所損若昇而寘之者士庶老稚相顧愕胎乃知王之靈益昭昭矣

三功祠
嘉靖浙江通志在玉磬山祀巡撫都御史

張津巡按御史解冤金壇縣令劉天和

安吉州志張津博羅

人巡撫都御史正德二年孝豐廣苕賊湯毛九作亂勢猖獗為民患十三年巡按御史解冤以聞命津督兵討之會金壇令劉天和有能名津檄至軍門贊畫賊聞風請降遂平今合祀於祠曰三功

忠義節孝祠

忠義祠在州學明倫堂東偏節孝祠

在州署東偏

國朝雍正五年署知州曹儀奉文建

孝豐縣

先農壇 在東郊外莊園

國朝雍正五年知縣徐元肅奉文建立壇宇并置耜田

四畝九分

社稷壇 湖州府志在西門外

風雲雷雨山川壇 萬厯湖州府志在南門外嘉靖

四年知縣郭治改建

邑厲壇 萬厯湖州府志在北門外

城隍廟 湖州府志在儒學之左

國朝康熙五年知縣楊錫汝重建

天目山龍神廟 弘治湖州府志在縣西南五十里

金石鄉廟有龍井禱雨極有靈驗

忠義節孝祠 忠義祠在明倫堂西偏節孝祠在西

門舊鄉約所基地

國朝雍正五年知縣徐元肅奉文建

寧波府

鄞縣

附郭

先農壇 在東郊十九都三畝方字號內

國朝雍正五年知縣吳槃奉文建立壇宇并置耤田四

畝九分

社稷壇 成化四明郡志在城西隅大卿橋南

范欽社稷

壇記壇廣五丈高三尺四出階各三級外設四門繚以周垣正統三年知府鄭公珞加葺成化三年知府方公達稍飾治之於今且百年矣蒼莽叢生積垢成阜南昌張公正和來蒞按規度宜掄材程役芟其蕪翳品其階列壇壝式崇松柏羅植門垣翼衛扁鐫惟謹

風雲雷雨山川壇 寧波府志元置城東南隅明

洪武初改建府城南甬水橋東正統間知府鄭珞

增修

郡厲壇

嘉靖寧波府志在府城北門外一里

舊浙江通

志以上三壇附郭不別置餘縣如制

城隍廟

成化四明郡志在府東南二里握蘭坊舊

在府西南梁貞明二年始建宋嘉定九年攝守程

覃奏賜廟額曰靈佑十三年燬守俞建創新之元

至大二年又燬延祐七年重建明洪武四年燬守

張琪徙建今地正統二年知府鄭珞重修殿宇廊

廡增構軒三楹於正殿南正統十年知府陸奇肖

像後殿

黃潤玉
為記

國朝康熙間重修

旗纛廟

嘉靖寧波府志在寧波衛治內東北

銅盆浦龍神祠

成化四明郡志在縣南二十里銅

盆浦南龍宅浦中禱雨輒應

靈淵廟

嘉靖浙江通志在縣東五十里阿育王山

按舊志環廟有聖井七而中井有靈鰻二旱禱之

輒應宋元祐元年賜額

顯濟廟 嘉靖浙江通志在縣西南六十里四明山

祀天井之神井凡三內有金線蜥蜴能興雲雨宋

嘉定九年賜額

張良臣龍井新廟紀德碑乾道二年郡自夏不雨六月制置敷學趙

公分禱山川丁丑鄞尉趙君公砭將命來龍井讀祝竟天油然作雲得蜥蜴二以歸戊子有司迎神雨水門雨則大至越三日告足尉復奉神歸已事而竣俄有光發波間如叢炬復紅燄飛動下見龍之首甚大鱗甲燦燦有光久不沒七月建新祠拜神之休不忘

海神廟 延祐四明志廟在東渡門裏舊浙江通志

相傳神姓羅名清宗好修黃白飛昇職統海中諸
龍王祈雨輒應

顯德廟 嘉靖寧波府志在縣北三里桃花渡北神
姓姚名器凡海艘遇颶者有禱輒應故稱顯德之
神元大德間都漕運萬戶盧榮感神效靈運道捐
址建祠其地又有余使君廟

會稽廟 舊浙江通志在府南三十里相傳祀大禹
之神

鬼谷先生祠 成化四明郡志一在縣東三十里祠前有黑水池俗傳先生洗硯處一在縣東六十里
太白山南滄壘水簾洞

董孝子廟 嘉靖寧波府志在府治南六十步祀東漢孝子董黯陳敬宗重建董孝子廟記漢和帝封孝子純德徵君即故宅立廟以祀唐大厯二年刺史崔殷嘗葺明洪武四年封為董孝子之神每歲六月六日有司致祭

關帝廟 成化四明郡志在縣東南五里靈橋門外
教場北

靈應廟 成化四明郡志在縣南畫錦橋北舊名永

泰王廟宋以來累封為忠嘉神聖惠濟廣靈英烈

王

胡熒重建廟碑鄴故有廟以祠忠嘉神聖惠濟
廣靈英烈王歲久傾圮寧波太守三山鄭公珞

貳守宜陽彭公鏞尚寶少卿致仕袁公忠徹合部
民之議復撤新之木幾鄭公以秩滿去今太守浮

先陸公竒來守是邦克終厥事告成來徵文王鮑
氏叔牙之後世居會稽之鮑郎山至王父去隱鄮

之青山晉太始三年九月十五日王乃生有神光
照室之異遂名曰圓照後更名蓋建興四年七月

十五日終於家葬鹿山之原永和中邦人立廟鹿山塑王像歲奉祀之梁大通間封永泰侯唐聖歷中始立今廟宋崇寧中改廟額曰靈應政和八年詔封惠濟宣和三年加封威烈六年加封忠嘉建炎四年加封廣靈紹定間丞相史彌遠作新其廟端平三年改威烈為神聖嘉熙元年加封忠嘉神聖威烈惠濟廣靈王元至大三年六月詔重建祠宇至正二十年改封忠嘉神聖惠濟廣靈英烈王嗟夫王之生也能弭魚龍之患以甦舟人其歿也復能用其威靈擒奴沙之黨禦滕州之盜擁護高宗之播遷至於招通米臘早暎雨滂禱之輒應自晉迄今千數百年而王之封號愈隆無替廟之重建始於正統癸亥五月初六日訖工於乙丑歲季秋望日

靈波廟 成化四明郡志在縣西二十五里望春山

齊梁朝有神姓白名玉常乘玉龍往來顯跡累著

唐賜額靈龍宋熙寧七年改今額

嘉澤廟 嘉靖浙江通志在縣東錢湖北祀唐令陸

南金宋守李夷庚又名李陸二公祠

闕杞李陸二公祠堂記東

平呂君獻之為鄞主簿之二年新錢湖之六隄又
考迹其初不忘前人之功俾揭示來者立李陸祠
於其隄之旁始唐天寶間縣令陸公南金開湖之
廣為序濬隄浸之饒歷宋天禧中太守李公夷庚
補其舊之廢址增築全固經畫以制使數鄉之民
雖大暑甚旱而卒不知有凶年之憂二公之功及
乎民可謂深且厚矣以功則安而久以德則服
而化雖相去數百年猶仰其風采豈不盛哉

賀公祠 嘉靖浙江通志在縣治西南月湖中唐秘

書監賀知章讀書故地宋紹興間郡守莫將嘗建

逸老堂祀知章元初堂廢以其地置驛至正十九

年郡得知章石像因祠於驛東明洪武初徙今所

陸瑜謁賀秘監祠詩春水微茫春草新廟庭花發
鳥聲頻黃冠一曲膽遺像明月三洲仰昔人故宅

已憐為傳舍散廡應喜托芳隣他
年幸遂歸湖願為向先生一薦蘋

澤民廟 成化四明郡志在縣西九里堰旁唐大厯

間刺史吳謙字德裕有善政郡民祠之

遺德廟

嘉靖寧波府志在縣西南五十里俗稱宅

山廟唐鄧令王元暉築堰捍江引宅山水入小江

湖灌溉甚溥民德而祠之奏封善政侯宋咸平四

年重修乾道四年賜今額

蘇為重修善政侯祠堂記琅琊王公元暉唐太

和中出佩銅章字人海徵時屬承寬之後躬行阜俗之化以勤儉誠游惰以誠慈崇孝慈貪夫斂手於袖間暴容屏跡於境外能使婚嫁有序慚獨有依他民愁嘆我則民懷乎燕樂他民凋瘵我則民豐乎衣食詩所謂豈弟君子民之父母若鰥先是厖上連江厖田宜稻每風濤作冷或水旱成災採石於山為隄為防迴流於川以灌以溉通乎閩下之澤建乎不拔之基能於歲時大獲民利非所謂

法施於人者乎能禦大災者乎太博王君鸞侯之
德聲謁其祠庭門榛砌蕪暴露尤甚乃嘆曰將何
勸乎吾將新之吏忻民惟風動草偃擇木探日經
之營之於是遷祠之基於堰之上使泛舟者賴其
德力農者懷其恩遺愛之道載彰嚴祭之禮斯備
在江之詩佑我蒸民庶使享斯廟者知仁政之可
尚也俾旌如
在無愧直書

茅山靈應廟 成化四明郡志在縣西南三十五里

唐張仁皓之祠也

周汝弼茅山靈應廟記神初度靈光燭城暨長神武慈裕有經

濟才仕歷兵馬鈐轄使黃巢亂草竊乘而起渚鴻
離散公振威德撫之沒於茅山之陽屢著顯跡所
司聞於朝得謚武忠遂立廟以祀焉時宋紹興
某年也開慶初神兵效順咸淳中加謚靈應

石將軍廟 舊浙江通志在府西九里望春橋祀宋

武威郡王石守信

陸瑜重建石將軍廟碑王開封人始與宋祖同為周臣宋代周

以佐命元勳封衛國公追封武威郡王謚武烈於戲宋室名將若王之威勇智信者誠不多見宜其生為英傑歿為神明世遠而若存也當高宗幸浙金人南侵見神兵被野有大旗前導號曰石將軍俄為楊沂中所敗宋祚中興亦王之靈有以陰翊之也故鄉民思其功而祀之

靈顯廟 延祐四明志在縣南四里相傳祀宋鄭世

忠建炎間隨駕至鄞死於王事邑人義而葬於金

谷里陳魯後隆之原屢顯靈異有功於民開慶元

年賜今額

岳公行祠 嘉靖寧波府志舊名下塔山廟在縣東南三十五里宋端平間以岳武穆王飛嘗顯靈於此故里人祠之

茶場廟 延祐四明志在東北隅拱星坊北舊浙江通志神姓徐名硯宋咸淳間以副提舉領茶權使時積苦兵草權及茶稅民間有茶一株立削猶編茶戶硯請於朝得報罷因即其場而祀之

正學祠 嘉靖浙江通志在府治南鎮明山祀宋儒

楊簡袁燮沈煥舒璘嘉靖三十一年建

薛應旂正學祠記宋

興百有餘年諸儒繼出立言著論固皆足以為聖賢之羽翼至於直窺堂奧上邇本真而獨得夫傳心之學者象山陸氏蓋不可及也當時雖其門者若慈溪楊敬仲及袁叔和定海沈叔晦奉化舒元質皆高第弟子以道義相切磋而深有契夫陸氏之學特以其師之學與晦菴朱氏入門路徑微有不同所以是朱非陸之說蔓延於天下今以一明州之地萃茲四賢而久無專祀不得與藝之何王金許並列者無亦朱陸之故也乎嘉靖辛亥余視學兩浙遂與寧波守成都孫君宏軾議合四公而祠祀焉因即郡城鎮明菴廢址建堂立主題四公之謚安安如禮

德惠祠 嘉靖寧波府志在縣西十六里祀知府林

富及邑儒士楊欽正德八年建

陳槐德惠祠記寧波府治西僅舍許

有湖一區名曰廣德會鳳鰲桃源諸水潞而為湖
西鄉稻稌稼林之田攸賴宋政和間樓異典鄉郡
決隄去壩墾而成田凡八百餘頃課租四萬石以
資國用民之藝湖田者惟納租而差發不與宣德
正統間法改常度租調興焉民始告病以後差發
日急湖之民病科征而逃亡者日衆浸淫至正德
初益甚欽憫鄉人之困鬻資為費走京師具陳湖
民重困逃亡之由援慈溪花嶼湖田全折之例以
上天子允其奏戶部移案於浙之藩臬有司內懷
疑懼莫敢先發郡守莆陽林公獨斷於已數言於
衆曰上不失朝廷惟正之供下可以舒湖民偏重
之困上下帖然無或異議竟得全折如花嶼湖例

湖之民感林公之德食楊欽之惠
請之於官立祠樹碑以表里居

仰德祠 仰德祠碑記祠建於行用庫西南隅祀郡

守射洪楊公竄嘉靖七年九月建

趙宣楊公事寶
宇殿之由工部

郎知寧波府公恕宅心勤廉律已臨民大仁愛之
施決獄去冤滯之弊隨任惟一童自奉無兼味俸
餘出資公用引鈔復歸商賈朝夕靡寧始終一節
以直招尤不偶當道解組行郡人號泣如失怙恃
戴白垂髻攀轅不忍捨者動以萬計至終不可留
繪像刻木共欲建祠崇祀連遭歲歉功緒未就初
邑大夫劉公欲舉此適秩滿不果今耆民邵澄翁
鍾等白其事於繼任高公信而許之捐俸資躬經
度而督治屬民李澄錢鉅輩各出木石工匠之費
樂從者爭先恐後卜登瀛橋之門可百步廢址隙

地建正廳四楹翼以廂廡門棗而高大之傍置舍
為賈廩取稅以修春秋祀事興工於丁亥十月落
成於是歲冬底公於既去之後感
人如此雖龔黃卓魯未之或過也

崇德祠 嘉靖寧波府志在縣西南十五里十字港

祀副使陳槐槐嘗力主湖民奏減租議有德於鄉
卒鄉人思之請於郡太守魏良貴立祠祀焉

旌忠祠 舊浙江通志在鑒橋北祀明御史陳良謨
良謨殉甲申之難

國朝順治間奉

勅立祠

賜額旌忠

忠義節孝祠

二祠俱在西南八圖鄞縣學儀門外

國朝雍正五年知縣吳槃奉文建

慈谿縣

先農壇 在東郊外坊一畝

國朝雍正六年知縣劉國傑奉文建立壇宇并置耜田

四畝九分

社稷壇

嘉靖寧波府志在縣北門外

風雲雷雨山川壇

慈谿縣志在南門外半里許

邑厲壇

慈谿縣志在縣北門外半里公館側

城隍廟

天啟慈谿縣志在縣西自初建後廢置不

常宋咸淳二年重建元至元五年義士童金重修

明洪武四年拓其故址增建廊廡左右門歲久而

圯萬曆辛亥令陳其柱重建歲以春秋仲月上巳

日祭

劉伯淵新建城隍廟碑記慈邑城隍廟在縣西歲久柱棟欹撓赤白漫漶不稱所以瞻仰

之意當事者方以歲之不易業有待也邑人邵相
慨然首捐已田為倡邑有願入貲者咸籍之勿為
限又以舊址偏左稍隘請於官拓地若干丈前堂
神所憑依左祀文昌右祀趙尚書傍兩廊各六間
凡墜茨丹葭為神而設者戒誓齋宿為官而設者
莫不犁然以次修舉費鉅千五百兩有奇經始萬
曆辛亥春落成
成己未冬

國朝康熙三十四年知縣方允猷暨邑人重建三十六
年知縣羅萬象重修

順濟廟 成化四明郡志在縣東南七里地有白龍
潭禱之輒應宋淳熙八年建廟寶祐六年賜今額

闕公廟 明一統志在慈谿縣治東北祀吳闕澤

青木山廟 嘉靖寧波府志在縣西南二十五里青

山峭壁之下晉劉牢之禦孫恩盧循嘗駐兵於此
一戰而捷民賴以安時山木茂挺成圍立廟以祀
因以名焉

張孝子廟 嘉靖浙江通志在縣西慈孝坊祀唐孝
子張無擇初無擇附於董孝子廟洪武四年以董
孝子既廟於府城因專祀無擇於此歲九月九日

祭

傳詳孝友

成化四明郡志宋嘉定十四年邑人李夢

林請於縣立祠

張埏謁孝子張公祠詩聞說吾宗多孝友先公大行重當時千秋廟

貌尊遺典一邑居民仰令儀自昔庭烏能反哺到今溪水尚稱慈百年我亦為人子感慨徒興此嵒思

孔君廟

嘉靖寧波府志在縣西南六十里安國之

十四世孫名殷字德盛仕唐至大理丞避黃巢之亂至此嘗有德於民既歿民立祠奉之

嘉德廟

慈谿縣志在縣西南二十五里祀梁羅甫

王演嘉德廟記按慈谿邑治西南里名孝順有羅府君廟益朱梁貞明間羅氏始遷之祖諱甫自桐廬挈家避亂至此因居焉初斯地蕪棄久閒無居人君至耕稼乃作地日益墾資日益裕從而居者益衆君歲時躬率其父兄子弟祀田神而教以禮敬講學務農蔚成善俗其地枕江有浦與渡居人遂號其江曰羅江浦曰東羅浦西羅浦渡曰羅家渡其為人向慕若此君沒葬黃耆衡里人懷念不能忘作祠西羅浦之西君舊祀田神所也歲時饗祀以其子配食宋建炎間縣令林叔豹聞諸朝賜廟額嘉德凡遇早澇癘疫衛於神必應

楊文元公祠 嘉靖寧波府志在縣北慈湖之上祀

宋學士楊簡

陳文定公祠 嘉靖寧波府志在縣西南一里祀祭

酒陳敬宗嘉靖初建

杜光祿畢主簿祠 慈谿縣志在鳴鶴場白湖之濱
明嘉靖三十六年建祀贈署丞杜槐縣主簿畢清
於其死事所祀以歲十一月二十日

彭侍郎祠 嘉靖寧波府志在縣杜湖之西北隅祀
侍郎彭韶弘治己酉韶奉命整理鹽政臨鳴鶴場
寬恤民竈邑人思之飲食必祝都轉運林堂為立

祠

袁文榮公祠 慈谿縣志又名元峰書院在北門外

祀大學士袁燁

王禕登謁袁文榮公祠詩雲中烟火映荒祠遺像蕭條入拜疑馬策

叩門惟有淚崔羅張戶不勝悲山光夜暗圍棋墅海色寒埋掛劍枝千載何人能下士斷腸空憶鄭

時當

陸詹事祠 舊浙江通志在縣北門外祀詹事陸中

善春秋二祭

汪文毅公祠 舊浙江通志在清道觀東祀明邑令

汪偉

忠義節孝祠 二祠俱在學宮西偏

國朝雍正五年知縣劉國傑奉文建

奉化縣

先農壇 在東郊三都一畝距城五里

國朝雍正五年知縣黃霖奉文建立壇宇并置耜田四

畝九分

社稷壇 成化四明郡志在縣北一里

風雲雷雨山川壇 嘉靖寧波府志在縣南一百二

十步

邑厲壇 奉化縣志在縣東北五里

城隍廟 嘉靖寧波府志在縣西一百步唐咸通六

年令李宗申創後燬元至元二十六年縣尹李天

益建明宣德間知縣周銓正德間知縣朱豹嘉靖

十二年知縣錢璠皆加修葺

國朝康熙二十一年邑紳俞廷瑞重修

靈濟泉龍祠 成化四明郡志在縣南一里宋宣和

中令周因植亭祀之

南山廟 奉化縣志在縣西六里相傳夏黃公之廟

資福廟 嘉靖浙江通志在縣東一里祀劉宋令謝

鳳元至正十九年賜額奉化縣志廟舊在方勝碑

旁宋令周因從今址元封孚祐侯明封宋縣令謝

公之神嘉靖末燬隆慶間重建歲九月十六日致

祭

陳觀資福廟記按古鄞志公名鳳即晉康樂侯謝靈運子也嘗宰鄞有功德於民至今祠之鄞

即今之奉化公為令時嘗作方勝碑溉民田五千餘畝又於碑北作橋以濟不通舊名謝鳳橋紹興間以慶登易之古有生祠在碑南政和八年令周因徙今所公為政寬平務施仁惠為神正直屢彰靈異凡水旱癘疫必禱焉嘉定八年有飛蝗蔽空而來民禱於神忽暴風疾雨驅之出境乃不害稼紹定元年大水漂廬舍留忠政橋陷龍津館民籲神求援水不為害嘉熙三年夏旱首種不入民禱輒雨咸淳二年夏作淫雨六七月之間旱禾盡槁民就祠禱之雨暘時若元大德丁未天災流行時境內無虞至大戊申歲大饑劍南有米舟至埭亭云有人招之問之則謝其姓而鳳其名民不為溝中瘠者神之賜也若此者衆不能盡述昔周因能徙其廟而不能請其封號後之人倘能數其事之本末而請於朝則神必能禦災捍患而報其上矣故書其事於石延祐改元九月五日記貝瓊資福

廟記初鄧人於公之存德之如父母建祠碑南像而事之及歿而其神益靈前進士陳觀為之記至正十九年寧海賊馮輔卿帥眾寇境官軍逆戰於珊墟嶺仰見大旗飛揚髣髴萬騎雲合而旗有謝字賊駭大奔斬獲無數二十七年正月己卯火民廬燬者若干且及夫子廟學正程式復禱於神尋反風滅火嗚呼古者忠義英靈顯一方者或出於偶然非皆神之所為也惟公庇民於冥冥所禱輒應而拯饑平寇彰彰於見聞而不可掩其功為何如哉故書其實以登諸石

靈祐廟 至正四明續志在治東北五里唐元和中

令陸明允有治行民德之祠焉宋淳祐中賜額封

永康侯

土埭堰祠 成化四明郡志在縣東八里神姓鄭名
準唐天祐中為鎮東節度使兼殿中丞侍御史奉
化縣開國子築土埭堰灌田五千餘畝明封唐開
國子鄭公之神

靈昌廟 嘉靖寧波府志在縣南五十里祀唐功臣

胡進思宋咸淳五年賜額

龔茂良靈昌廟記公字克開唐末事錢武肅王

天祐元年王建功臣堂記將佐功臣五十餘人名
於碑公居二馬忠獻王弟侬襲位暴戾荒淫公數
以直諫見疎侬廢弟忠懿王立公謝病不出年九
十八疽發而殞鄉父老立祠祀之宣和間睦寇方

臘起見甲兵擁白馬為前導者大敗賊兵因奏績於朝敕廟額曰靈昌公以武功著輔翼錢氏四世五王吳越安堵公之德其在是乎蒙正呂公扁祠曰觀德

北山廟 嘉靖寧波府志在縣北一里祀宋奉國軍

節度使錢億億惠愛及民卒葬於此邑人廟祀之

景祐廟 嘉靖浙江通志在縣東百里祀宋義士祖

域

宋源景祐廟碑景祐廟者宋殿前司統制祖公廟也公諱域字真夫其先閩人後徙奉化之松

溪有文武才建隆中以剛毅稱居鄉黨遇歲饑發私廩以賑饑夫所活以千計里有昏喪貧不能成禮山財帛周助之子弟不能學者為招師儒使就學邑人德之既沒皇祐二年遂作廟於忠義鄉之

福慶里有故必相率趨禱滅火愈疾屢著奇徵元祐中漁者鄧祺徐寶泛海值風舟起立者數四呼神求救公忽見於空中應之俄而火光如斗墜檣下風頓息起視所在舟已至廟下矣建炎四年高宗南奔御舟次崎頭金人追將及見赤旗數萬蔽海上沮懼而退是夕提領海舟張公裕夢神人虎報魚服奏對上前自稱官位姓名公裕以聞高宗多公之績封文惠侯賜廟額為景祐元至正二十四年加以昭烈之號崔斯立重修景祐廟記洪武四年二月詔封奉化縣景祐廟故文惠昭烈侯為義士祖公之神歲以三月十九日有司致祭用牲於廟灰一禮也里士卓道長等以神之光被嘉寵若是而庭宇杭敞弗稱遂稟資命工以作新之經始於洪武五年十月竣事於六年五月

靈應蕭王廟 成化四明郡志在縣北二十里

孫勝重建

靈應蕭王廟記直隸北二十里有嶺臨於溪上嶺曰界嶺溪曰泉溪而蕭王廟實在焉按舊碑神姓蕭諱世顯字道大漢蕭相國之後裔也宋天禧二年來令於奉撫字心勞廉公節儉民甚德之慶厯二年民追誦其德始祠以祀神大著顯應恩普德洋洋祐十二年賜廟額靈應元進封綏寧王嗣從屋漸隱永樂間復其故名曰靈應蕭王廟正德辛未正殿災壬申秋相與鳩堅蒐良四方之人歡來趨事新廟落成視昔有加

周南廟 嘉靖浙江通志在縣南一里祀宋縣令周

因

戴杰周南廟記侯號南靈政和七年來宰是邑興利除害宣和間邑之君子蒼老咸思之曾公

粹中作謠立祠於邑之南驛道左歷年寢久曹公所記之文剝落難考所幸存者惟是謠焉以載於

石謠曰侯育我兮民淳民感侯兮慈仁築河碑兮
水粼粼開池井兮水沄沄我農耕兮河之濬我農
耘兮泉之瀆土田沃兮稻如雲歲功成兮德澤均
以食以餐兮子孫說說歌侯之勲兮頌侯之勤頌
侯之勤兮
歌侯之勲

善塘廟

嘉靖寧波府志在縣東北五里祀宋左朝

議大夫仇愈

陳居仁待制仇公善塘記公字泰然
青州益都人紹興初知明州雅愛奉

化山水之秀因寓居長汀之曲長汀東堤數里之
間流多曲折靈雨潦漲故堤不足以捍橫流公修
築堤塘約七百餘丈又於堤塘北伐石為一碑名
曰沙堰碑以通田澗故溝澇則殺其水勢之奔突
早則資其清流之灌注於是宅土者得其安耕田
者得其利紹興十六年公沒越明年父老士民於

塘之曲立祠繪像以奉名曰善塘祠以其能禦捍橫流為善流又嘉其善作而善成也

顯忠祠 舊浙江通志在縣東告成寺塔下祀明靖

難死事拾遺戴德彛

姚涑顯忠祠記戴公德彛之死難幾百四十年人諱而不

稱涑自入史館知公大節北兵南下長江不守公以身殉主禍延宗黨此公死事之迹也嘉靖戊子邑侯陳君縞至涑為言之陳君請於觀風者而祠之學宮猶未有專祀也越五載海虞錢君璠繼宰是邑涑復告之乃闢地社學之左為宇三楹顏曰顯忠祠屠隆謁顯忠祠詩乾坤蒼莽暗風塵不道時危好致身萬里山河歸朽骨九天日月照孤臣樽前空灑蘋花淚死後誰回白草春霜落高城遺廟肅墓田蕭索過行人

趙公祠 在縣南六十里祀

國朝總督趙廷臣康熙八年命使巡海公與之借由台
至寧卒於馬家舉士民立廟於驛南

忠義節孝祠 二祠俱在縣學東偏雙司基

國朝雍正五年知縣黃霽奉文建

鎮海縣

先農壇 在縣城西門外距城五十步

國朝雍正五年知縣田長文奉文建立壇宇並置耜田

四畝九分

社稷壇 鎮海縣志在縣城西北一里

風雲雷雨山川壇 成化四明郡志在縣西一里

邑厲壇 鎮海縣志在縣城外西北一里

城隍廟 嘉靖定海縣志在縣東南城邊梁貞明三

年建元至正二年重建明洪武四年知縣杜彬廣

其址重修永樂十三年圯正統間知縣戴鍾重建

天順六年知縣賀懋加修

國朝康熙元年知縣王元士重建

龍神廟

在縣東鎮遠門外十里海山洞口

國朝雍正五年奉

勅封涵元昭泰鎮海龍神發帑銀二千五百兩創建祠

宇八年知縣張珽奉文建

靜波廟

成化四明郡志一名薛將軍廟在縣西世

傳薛仁貴征遼道經於此撫安人民鄉人立行祠焉

顯靈侯廟

延祐四明志在縣西五里侯姓孔象山

童翁浦人行第七性剛烈死於海有劉贊者夢侯
曰上帝錄我善命為境神已籍水府吾屍泛於沙
浦君能收葬創數楹俾有棲托必為民利贊訪問
果如夢即所居奠而祠之錢氏有吳越乃立廟宋
高宗幸海道賜額顯靈

治水判官黃公祠 嘉靖定海縣志在縣西北靈緒

鄉武功村祀宋浙東轉運司判官黃恕

鄭清之黃公祠記慶

元之屬縣曰定海者東濱滄溟世苦潮患治北走
二舍則莊闕村之新土塘也稍北則武功村之和

尚塘也界則流淖淤蕩沒莫測其底南北相距
百餘丈周袤數則橫亘阡陌之間嘗聚土列石甃
之北將成水從下湧汎溢無際時或靜夜有聲如
鼓翌日必大決海潮則應揚濤洶入桑田殫為斥
鹵歲或十餘決週年尤數衆共神之望洋感額束手
浩歎而已值太府卿知府事兼沿海制置使章
君大淳蒞職大濬湖渠百廢具舉乃共以狀控之
時公領轉運判官素以廉幹聞章君遂屬以厥事
公慨然任之露處野宿躬荷鍤督役運土石垂成
而復決者屢焉乃廣募良采有術士排衆直前曰
是地也無物而聲無風而濤龍罔家所蟄也投以
生人彼畏陽而縮功可立奏公色忿然瞋目視曰
修此以為民也哉人以求成功何心哉必爾捐吾
身耳厥明齋沐具少牢以奠再拜為民請命少頃
其下復有聲衆駭懼擾亂旁有峻崖公策馬臨之
諗於衆曰吾死於此若輩奮力語未究崖崩如雷

公併馬溺馬衆號擗聲震原野已而波濤恬然乃如公命投土不復淖決三日封土與兩塘連接忽塘右數十步外水起如注衆方懼復決俄湧公屍出據鞍攬轡顏色如生民爭出資具衣冠殮焉時淳祐戊申夏四月八日也公舍人欲歸其柩民攀輿泣曰我公祛百世之害當享百世之報願乞衣冠葬而祠之章君以聞於朝勅進秩宣撫判官聽民立廟三旬廟成公諱恕字文揆別號東浦

張越國公祠 鎮海縣志在縣東北二里巾子山上

祀宋忠臣張世傑

卞公祠 成化四明郡志在縣東北五里元至正二十八年朝列大夫卞燾痛父樞密承旨卞良輔死

於王事因於山下立祠

表功廟 嘉靖浙江通志在縣東南隅祀信國公湯

和賜廟額歲春秋祭

海道譚公祠 鎮海縣志在縣東二里威遠城內明

嘉靖四十一年知縣何愈建祀巡視海道副使譚

綸

張時徹譚虛二公祠記東南夷寇之患起於積弛天子博咨才碩以任驅除梅林胡公實專節

鉞時則有若巡海副使譚公綸文武兼資有若都督同知盧公鐘宿嫻韜畧胡公試於有衆倚為腹心二公相與議曰定海海壖奧區而招實則郡治之門戶也此其山去縣城百武而近賊如登而據

之飛砲其上則縣城瓴甃碎耳即夷船尾啣而入亦何以制之為戰守計者宜莫如城招寶便乃以其意裁於胡公公輒報訪卜日鳩工於時文武吏士惟欣鼓舞以為更生之賜乃為祠以祀胡公已復為祠祀諱盧二公兵志曰上兵伐謀又曰善師者不戰其三君子之謂乎祠而祀之夫誰曰不可

都督盧公祠 鎮海縣志在縣東北二里明嘉靖四

十一年為都督盧鏜建

翁大立都督盧公生祠記
公樹勛海上五十餘年矣

以年踰七十請老於朝上未允所請而濱海士民恐公一旦懸車亟謀肖公像為祠尸祝嗟乎公身經數百戰前後俘斬萬餘海上之勲無踰公者昔信國封公廣寧封伯朝廷今以兩者待公公胡遽言去也公名鏜別號北山以處州衛指揮起家其子相有父風臨陣身先士卒父子一時崇功偉業

照耀海內亦古
今之所難者歟

都督俞公祠

鎮海縣志在縣東半里鎮遠門內明

嘉靖三十五年為都督俞大猷建

豐道生俞公生祠記舟山者定

海之塞也賊據山閭歲公圖於副使方湖王公授畧於指揮張四維縱兵擊且焚殆盡擒百四十獻於胡公其民歸於田屋舍妻孥晏然復矣於是詔進公都督同知總兵開府定海定海之士民相與難壤構祠而尸祝之

忠義節孝祠

二祠俱在學宮東偏

國朝雍正五年知縣田長文奉文建

象山縣

先農壇 在城東三百步

國朝雍正四年知縣馬受曾奉文建立壇宇并置耤田

四畝九分

社稷壇 象山縣志在縣西彭姥嶺下

風雲雷雨山川壇 象山縣志在縣西南半里

邑厲壇 成化四明郡志在縣北八十步

城隍廟 象山縣志舊在治西南四百步東嶽廟之

前唐神龍二年建明洪武三年遷於縣之東北一里東塘山下嘉靖二十年令毛德京築城工畢徙縣東南文峰塔之右

普濟廟 嘉靖浙江通志祀龍神宋南渡初賜額曰

靈濟明改賜今額

蔣景高普濟廟記象山踞海而邑大縣東南三十五里山勢垂

盡入大海中抑而復昂島嶼角立山之下巖竇空洞中垂石柱如踞龍湫宅其內潮汐衝撞旦夜不息惟暮春之三日水退人可遊馬石乳巖花繡紛欲墜蓋龍之所居云歲旱禱祈即應故立廟以祀之廟在東山之隈赤巖之陽宋熙寧間縣令黃顏為記及高宗南渡舟幸海道風濤震驚神之功曹

柳氏昆弟三人顯忠效靈以濟艱危由是賜靈濟廟額元之季年屋久而圯弘治癸丑冬主簿孫德仁乃經始而謀度之縣丞賈行簡典史張克巳又從而贊襄之爰出稍廩以先士民甲寅孟夏新廟成告

顧長官祠 延祐四明志在縣城內長官名方字正夫丹陽人宋皇祐末登進士調象山令勸善懲惡建學舍教子弟逾年民大化後卒邑人思慕相與立祠

陳元帥廟 象山縣志在縣西南二十里又名靈濟

廟

周希程陳元帥廟記元帥宋丞相宜中從子名失傳行十五少負勇畧拜議郎理宗時屢立戰

功擢大元帥德祐中扈從舟次象境金井灣得暴疾知不可起遙向帝舟叩頭長恸而逝遂葬於婁嶺之麓麾下死義者四人殉葬墓側一夕鄉民夢神語曰元兵至矣我將拒之數日果見元舟蔽海而下乘風徑入一鄉群易元帥率陰兵列海岸元兵望兩岸皆軍遂退去明日復來人如之民得保障因立廟塚上祀焉明嘉靖三十八年倭寇百餘屯四都海道譚綸部兵來勦神効靈助順遂捐資修廟更建石坊隔曰神武

錢尚書祠

寧波府志在治西尚書諱唐明萬厯三

十六年立祠春秋有祭

忠烈廟 嘉靖寧波府志在縣東北四十里祀明死
事千戶易紹宗

毛公祠 象山縣志在治東南城隍廟右明嘉靖十
九年令毛德京建象城功在不朽民祀之

忠義節孝祠 忠義祠在縣學左側節孝祠在縣治
東隅

國朝雍正四年知縣馬受曾奉文建

定海縣

先農壇 在東門外一莊

國朝雍正五年知縣李灼奉文建立壇宇并置耤田四畝九分

社稷壇 定海縣志在西城外半里祈雨山下

風雲雷雨山川壇 定海縣志在南城外半里觀山之麓

邑厲壇 定海縣志在北城外北山之麓半里許

城隍廟 祭附山川壇

國朝康熙中始建

繆燧新建城隍廟記邑之祀城隍所以崇保障祝安釐也定邑海經廢徙

廟亦因草無定展復以來初置簡畧僅蔽風雨而已余抵任即與鎮府藍公斤俸鳩工已卯復偕閩邑衿庶捐資重建規模就儀衛改觀蔚然與壇壝學校並峙於城郭數里之內

岱山廟 延祐四明志在北海中世傳隋末陳稷沒

後顯靈於此

天妃聖母祠 定海縣志在治南岑港魯明萬厯間

建

屠隆天妃聖母祠記州治南去里許阻山下即南關津渡處山之陽天妃聖母宅焉顏垣敗宇

焚修久廢登覽者悽然夫東南恃舟師以寧舟師恃神庥以濟厥靈弗安當事者之過已萬厯辛巳

參戎表侯來守是邦登山謁聖母祠顧而嘆曰澤國洪濟實式憑之我軍民所共乞靈者其屑越之也輒捐俸如千聚材鳩工塗墍完整洪流滙前峯環錯朝曦夕暉頓成勝覽於是人具瞻而神寐普矣甲辰春仲告成

成仁祠 定海縣志在北門外

國朝康熙四十二年知縣繆燧建祀吳鍾巒張肯堂等數十人

忠義節孝祠 二祠在明倫堂左偏

國朝雍正六年知縣李灼奉文建

浙江通志卷二百二十